

KOTIAMA LOKUMU YA MWANA ⁴



Ndeko Neville, mpe nsima ya nzánga, mpokwa malamú, kútu, na baninga na biso ya motuya, tozali na esengo ya kozonga awa, na losambo, na mpokwa oyo. Mwa molunge, na bongo, tokomeka kosala nokinoki na ndenge tokokoka, mpe kokóta mbala moko na Liteya.

Liboso, tozali na mwa mayebisi ya kopesa, mpe li—lilombo moko ya libondeli libanda na momesano. Nazuaki mikanda na bino, kuna, oyo epesamaki, mpo na ndeko mwasi oyo azali komiyoka lokola azali na tumeur na bongó. Mpe mosusu ezalaki na Louisville; mpe mosusu, ya ndeko mobali ya motei moko, tata na ye asali crise cardiaque; mpe ezali na bato na malali mingi, mingi na mokili lelo. Mingi bazali kobenga mpe na ntembe te, tobondeli mpo na bango na motema na biso mobimba, ete Nzambe ásungá biso.

Na momesano, pene na ntuku libwa na mitano likoló na mokama ya lotómo na ngai ezalaka ntango nyonso kobondela mpo na babeli, bomoni, kasi na—nakómi komona—nakómi komona lokola ete. . . Nazali kaka kobondela mpo na babeli, sikoyo, bóbosana yango te. Etambolaka mpenza elongo ná yango. Kasi, oh, soki tokoki kosala ete li—lingomba ézua esika na yango, na bongo, mpe émitia na molongo mpo tókoka kobanda mpenza mosala, bomoni. Tosengeli komibongisa, bomoni, kotia makambo nyonso esika moko.

Eloko mosusu euti kobeta motema na ngai, eleki mwa ngonga. Ezali ntango mwa ancien combattant moko, moko na maboko na ye ezuáká masasi pene ékatana, lokolo, ezuaká masasi pene ékatana. Azali awa te mpo na koyoka ngai sikoyo. Kasi azali mpenza mwana mokonzi ya solosolo, nkombo na ye Roy Roberson, azali moko na bayangeli misolo na biso awa na losambo, mpe Moklisto moko ya malamú mpenza. Apusanaki wana, mpe alobaki: “Ndeko Branham, kobosana Président te.” Alobaki: “Epesaki ngai mawa mingi, ntango akitaki,” amonaki yango na télévísion, “ntango azalaki kokita na mpepo, mpisoli ezokitáká na matama na ye, mpe monoko na ye ezotengama—tengama.” Boyebi, azalaki kuna elongo ná Roy ná bamosusu, na e—etumba wana.

Ata ozalaka na bokesene ná ye, na oyo etali politíki, azali kaka Président na biso. Iyo, misie. Mpo na ngai, na—nazali Démocrate te, Républicain mpe te. Nazali Moklisto. Kasi na—nakoloba boye, nazalaki solo na boluli mingi mpo na—mpo na Président Dwight Eisenhower. Misie, na ntembe te, azali moto ya lokumu, na ndenge na ngai ya—ya kokanisa. Soki aluki lisusu kozala mokonzi, mpe soki nasengeli kovoté, nakovoté ye

lisusu. Ya solo. Etali ngai te ata soki akómi—soki akómi na mibu mokama, nakoza kaka kovoté ye, mpo nasepelaka na ye. Mpe tókanisa ye na mabondeli na biso na mpokwa oyo.

J. T., na ntembe te, nasepelaki mpenza na liyangani kitoko wana, oyo bino nyonso, yo ná Ndeko Willard, bosalaki na mpóso oyo. Soki nákótaka, kouta na libanda, bino nyonso bolingaki koloba: “Malamu, Ndeko Branham sikoyo, oyebi, *boye-na-boye*.” Kasi ezali malamau koleka ete nátikala libanda mpo na koyoka bino, boye te? Malamu. Boye, malamau mpenza.

Napesami litomba ya kokamba mwa ba-losambo, soki bino nyonso bokolinga yango, soki bolengelami mpo na kokóma bakengeli sikoyo, soki boyekolisámá kozala yango. Mpe, yango, nandimi ete bozali na yango, mpe bolendisamá malamau mpenza. Losambo moko ezali na Oregon, mosusu na Washington, Californie, Arizona, mpe bisika ndenge na ndenge. Soki olingi kozua losambo moko, to eloko moko, ee, awa mpenza nde esika ya malamau mpo na kobanda, awa mpenza. Milimo ezali kobebelela bipai na bipai, ata na bitúka ya ba-Indien mpe bisika nyonso bokolinga kokende. Bóyebisa biso kaka, mpamba te nandimi ete bino, bandeko, botelemi ngwi sikoyo. Ya solo. nasepelaka mpenza komona bango kosala yango.

Ndeko Ruddell azali kuna na nzela. Nazokende kosala mayangani mpo na ye, na mwa mikolo ekoya. Akosala mayangani ya kolamuka, Ndeko Ruddell nde. Mpe na—nazoyeba lisusu, ete nazaláká kotindika elenge mobali yango bipai na bipai bisika nyonso, komeka kosala ete ye ábima mpe ákende koteya. Azalaki mpenza na bobangi. Azalaki koloba: “Nakokaka na ngai koloba te.” Bosengeli koyoka ye mpenza. Amen. Bomoni? Oyebi te oyo okoki kosala soki otiki ete Molimo Mosanto ásimba yo. Ya solo.

Mpe Ndeko Graham Snelling na Utica, ná Ndeko Junior Jackson kuna. To—tozuaka ba-losambo nyonso wana lokola baléki na biso, mpenza elongo ná biso. Bisu nyonso tozali elongo. Tokeseni te na malakisi na biso, to elikia mpe ba-ntina na biso, malakisi na biso, tozali moko. Totelemaka elongo, totiaka makambo nyonso elongo. Tozali boebele losambo moko. Mpe na ntembe te, tokosepela kozala na yango na bisika ndenge na ndenge; tozali na misusu na Afrika, misusu na Inde, mpe na bisika ndenge na ndenge, na ekólo mobimba. Kuna nde epai tolingi ete bázala, mpo na kopalanganisa Nsango.

Mpe nazali komona bilenge mibali oyo bazali koya, ndakisa, Ndeko J. T. Parnell, awa, mpe—mpe Ndeko Willard ná bamosusu, bazali koya, bilenge mibali, wana ngai nazali kokóma mobange koleka. Soki lobi moko ezali, bango nde bakozala bato ya lobi. Nalingi te Nsango oyo ékufa ata moke te. Ekoki mpe kokufa te. Esengeli kokóba kobika. Mpe nandimi te ete totikali na ntango molai mingi mpenza mpo na koteya Yango.

Bebé moke oyo balobaki alingaki kokufa, namoni ete ozalaki na ye, na ndakonzambe, mokolo mobimba lelo, ndeko mwasi. Ezali malamu mpenza. Totondi Nkolo mpo na yango, ndenge Nkolo azali na ngolu mpe atondi na mawa. Koba kaka kondima oyo elobamaki na yo awa, omoni, ekotambola malamu.

Sikoyo, bozali kosepela na malakisi? Bosepelaka na malakisi? [Losambo balobi: “Amen.”—Mok.] Oh, na—na—nabanzi mpenza ete ezosala biso malamu. Epemisaka biso mwa moke na kobondela mpo na babeli, bimononeli, ná lobiko na nzoto uta na Nzambe. Na ntembe te, sikoyo, na mpokwa oyo to . . . Nsima na liyangani, tokobondela lisusu mpo na babeli, na mpokwa oyo. Tolingaka ntango nyonso kosala yango, kobatisa bato ata na ntango nini.

Bato boni bazoyeba lisusu ntango nazalaká kotambola kolandáká nzela ya makonzi ya lótiliki? Ee, natámólá nzela ya makonzi ya lótiliki, mbala mingi, ezalaki kosenga kotambola bakilometre ntuku mitano na mokolo kati na zamba. Nasalaki bakilometre nkama minei na ntuku mitano kotambola kolandela nzela yango. Nazalaki kotambola kuna, simísi na maboko, mpe, oh, kolemba mpenza, kotamboláká na kati ya bazamba wana, mpe banzúbe ezalaki kozokisa ngai. Nakokutana na mobange mosali bilanga moko, tokofanda na nsé ya nzete mpe nakosolola na ye na ntina na libatizi na Nkombo na Nkolo Yesu. Alobaki: “Ee, nazalaka ntango nyonso na mposa ya kobatisama.”

Nalobaki: “Mokele ya mai ezali mosika te.” Mpe akoloba . . .

Nazalaki komema bato mingi kuna mpe kobatisa bango na Nkombo na Yesu. Nakozonga kolandela nzela ya basinga ya lótiliki, noki-noki mpenza. Ya solo. Mbala mingi, ná bilamba na ngai ya kala ya mosala, nazalaki kobatisa moto, wana nauti kokita na likonzi moko. Nazalaki kosala mosala kuna, likoló ya likonzi; nazalaki mpe kosala mosala ya kotia banzete ya basinga ya lótiliki, kosaláká mosala likoló ya likonzi, ná mobali moko, kosololáká na ye na ntina na Nkolo. Azalaki koloba: “Ee, Billy, mokolo moko nakoya na losambo na yo mpo na kobatisama.”

² Nakoloba: “Mpo na nini olingi kozela kino ntango wana? Tozali mpenza pembeni ya ebale, mái ezali mingi kuna.” Kanga bango na mbala moko. Ya solo. Wana nde ntango yango. Filipe alobaki . . .

³ Mokube alobaki na Filipe: “Mái yango oyo, eloko nini epekisi biso?” Ya solo. Eloko moko te. Soki olengelami, wana nde ntango yango. Kotika te ete zabolo ázua libaku ya kokótisa eloko moko kuna na kati. Kozongisa nsima mpo na lobi te, makambo oyo okoki kosala lelo. Ntango mosusu lobi ekoya te mpo na yo. Nazali koyeba lisusu mokolo moko oyo nasalaki bongo, nayekolaki likambo, epesaki ngai mayele. Nazongisaki nsima likambo moko oyo nasengelaki kosala mokolo moko, mpe mokolo oyo elandaki, ntango esilaki koleka.

4 Sikoyo, ya solo, nalingi kokanga bino ntango nyonso oyo te. Kasi na—namemamaka mpenza, mpe, nayebaka te, namiyokaka malamumu mingi na lolenge ete nakokaka lisusu komikanga te, tóloba. Namiyokaka mpenza malamumu.

5 Sikoyo tógumba mitó mwa moke liboso tókota na Liloba.

6 Tata na biso na Likoló, Ozali Nzambe na bomoi, ntango nyonso na bomoi. Mói oyo euti kolala, mói moko yango, Daniele amonaki yango kolala, Yilimiya amonaki yango kolala, Adama amonaki yango kolala, Yesu amonaki yango kolala. Mpe ezali mokili yango moko oyo bango babikaki mpe batambolaki kati na yango, mpe Otikali kaka kozala Nzambe yango moko.

7 Na mpokwa oyo, boséngá ezali mingi. Mobali moko azali na tumeur na bongó, ndeko mwasi moko azali kobanga likambo yango moko. Yo ozali elikia bobele moko, Nkolo, oyo ezali mpo na likambo yango. Tumeur yango ekómi mabe, eloko ya kosala mpo na kopekisa yango ezali te. Eleki mpenza mosika na makoki ya maboko ya monganga. Kasi na mpokwa oyo, tolandi mwana-mpate yango, ná mwa bilingóngo na biso, mpo na kozongisa yango na lopango ya Tata. Na Nkombo na Nkolo Yesu, totindi libondeli na biso mpo éboma nkosi yango, tumeur yango, libebi yango, mpo ézongisa bango na ndako, na kimia nyonso.

8 Mpe biso, e Nzambe, tokanisi lisusu, na mpokwa oyo, Président na biso ya bolingo, ndeko na biso, Dwight Eisenhower. Asili kokamba ekólo, Nkolo, asili komeka kobatela biso mosika na etumba. Alakaki ete etumba ya Corée ekosila soki azalaki na makoki ya kosala yango. Alakaki bamama wana ete akozongisa bana mibali wana. Kasi alobaki: “Mpo na ngai kosala yango, nakoki kosala yango te. Nakoki kosala makasi na ngai, kasi bobele Nzambe moto asengeli kosala yango.” Mpe Ozalaki na ye, Nkolo, mpe sikoyo makambo nyonso esili. Mpo na nini bakokaki komona yango na ebandeli te? Nzambe, nabondeli ete Ósungá ye. Pambola elimo ya mpiko wana, Nkolo. Mpe tobondeli ete Óponela biso mokonzi oyo asengeli koya na nsima. Mokano na Yo ebongisama liboso ésalema, Nkolo.

9 Kasi Ye oyo azali na motuya mingi mpenza mpo na biso na mpokwa oyo, libanda na makambo ya ekólo na biso, ezali Moto monene mpe ya nkembo wana, oyo azali koya mpo na kotia Bokonzi oyo ekozala na suka te, Nkolo Yesu, Mwana na Yo. Na bongo, bakobwaka mandóki, loséba ekobeta mpe bitumba ekozala lisusu te. Bakolóna bilanga ya vínyo mpe bakolia mbuma na yango. Bakotongá bandako, bakofanda kati na yango. Mpe, mpasi ekozala lisusu te, nsima na yango, na ntango wana.

10 Pambola biso sikoyo, wana tolingi kokóta na Liloba. Mpe, Tata, Oyebi ntina oyo nazali kobelemá na Liloba uta na Likomi oyo mpenza. Ezali mpo na—namiyoki ete Yo olingi ete násala yango lolenge oyo, ete ezali mokano na Yo Nzambe, ezali na molongo na Yo, ezali na...ezali molongo ya mokolo ya

lelo, ya kosala ete bato bámona esika na bango mpenza, mpo bámilengela mpo na ngonga ya etumba. Ndenge ndeko na biso alobaki na libondeli na ye epai na Yo kala mingi te: “Oh, Oyekolisi biso mosala ntango molai mpenza, Nkolo.” Sikoyo, Tata, pesa biso mpete na biso. Tia biso kuna, na mosala oyo tosengeli kosala, mpo tókoka kosala mosala ya Tata. Mpo tosengi yango na Nkombo na Yesu, Mwana na Yo. Amen.

11 Nalekisi nsima ya nzánga moko malamumu mingi, na nsima ya nzánga oyo, kosololáká ná monganga moko oyo ayebani mingi na Louisville, infirmière na ye. Bayokaki nsango na ntina na makambo ya nkembo ya Nkolo. Tata na ye azalaki monganga. Ayaki mpe afandaki na biró na ngai, penepene nsima ya nzánga mobimba, ayaki na ye kaka kotala ngai. Moto malamumu mpenza; nde mwa matata, boyebi, ná mwa makambo makasi, Presbytérien moko ya solosolo mpo na kobanda, kasi alongwaki ná mpisoli kotanga na matama na ye. Oh, ngai. . . Nzambe azali na bango na bisika nyonso, na ba-biró ya minganga, na ba-infirmière. Nandimi te ete ezali na infirmière moko na Lopitalo ya Norton’s Infirmary, oyo natatolaki te epai na ye na ntina na kozala na Molimo Mosanto, mpe oyo nazangaki kotuna soki abatisámá na Nkombo na Yesu. Monganga moko te, oyo nakutanaki na ye, esika nyonso, to elok-. . . Bomoni?

12 Lobela bango na ntina na Yango. Tozali na ntango mingi te, ndeko. Ata ezali komonana lokola mpasi ndenge nini awa, zela kaka ntango okobimisa mpéma ya nsuka mpo na kokatisa na ngámbo mpe ómona, bongo okomona ete elingaki kozala malamumu soki ósalaka yango. Iyo misie. Kozela kino ntango wana te, tósala yango sika-sikoyo. Oyo nde ngonga yango. Oh, bakoki koboya, kosilika mpe kowelana mwa moke mpo na yango, kasi basalaka yango na nko te. Basalaka yango mpenza na nko te. Ba—ba—bazali na likambo te. Soki babandi kowelana ná yo, mi—mikanisela, ba—basálaka yango mpenza na nko te. Basálaka yango na nko te. Ntango mosusu balakisaki bango eloko moko mpe bakangami na yango, boye bo—bokoki komona likanisi na bango. Kowelana na bango te, kowelana na moto moko te, kasi linga kaka bango mpo bákota na likambo Yango. Na bongo bondela mpo na bango.

13 Ee, nakanisi ete tokómaki kino na molongo ya 9, nayebi mpenza te. Tozali mosika mpenza mpo na kokóma na mokapo ya 3, boye te, mibali? Kasi oh, Ezali mafuta ya nzoi na kati ya libanga, mpo na ngai! Tozalaki koloba sikoyo, bómikanisela, mpo tókoka kozua mwa mobóko lisusu. Sikoyo, Ndeko Neville, ó—óbenda ngai mwa moke, soki nazangi komona ngonga koleka, mpo nákoka kobondela mpo na babeli. Tolingi kozua makambo nyonso ya mike-mike oyo tokokoka. Mpe na mpokwa oyo, nalingi kobenga bato na etumbelo. Ngai. . . kosukisa na likambo oyo, na bongo ntango mosusu nakotángá kaka oyo etikali.

¹⁴ Kasi ntina ya likambo oyo, ezali, komonáká esika na yo kati na Klisto, komonáká ete ezali te eloko oyo obeti kaka libaku na yango, to eloko oyo ekokaki kozala na . . . oyo obongi na yango esika moko boye, kasi ezali eloko oyo Nzambe asalaki mpo na yo, Ye moko. Ezali te mpo ozalaki malamú mingi mpenza na lolenge ete okendeki na losambo moko, na mpokwa moko, mpe mwa ndeko moko boye akambaki yo na etumbelo. Mpe ezalaki oyo wana te. Ezalaki Nzambe, liboso na kozalisama ya mokili, nde aponaki yo liboso mpo na Bomoi na Seko. Ntango okokóma kuna mokolo wana, kokamwa te ndenge bampaka ntuku minei . . . ntuku mibale na minei balongolaki mitóle na bango, bango nyonso balongolaki mitóle na bango, bango nyonso bakweyaki ná bilongi na bango na nsé, bazalaki na eloko moko te bakokaki koloba, motei moko te, mpaka moko te, eloko moko te. Nkembo nyonso epai na Mwana-mpate! Nzambe akosangisa, kati na Ye, makambo nyonso, na mokolo wana. Oh, soki tokokaki koyeba mpe kososola nani Ye azalaki Ye oyo babákaki na ekulusu. Sikoyo, na . . .

¹⁵ Tokobanda na molongo ya 8, mpo na kozua mwa mobóko.

Asili kotondisa biso na bwanya mpe na mayele nyonso;

Ayebisaki biso libombami ya mokano na ye, . . .

¹⁶ “Mabombami ya mokano na Ye.” Mpe bomíkaniseli ndenge toumelaki na likambo yango? Bato boni bazalaki awa na ntongo ya lelo, tótala. Ndenge tokangamaki na likambo yango, “libombami na mokano na Ye.” Sikoyo, ezali kaka mwa likambo moko boye te, na bongo ezali libombami. Mokano ya Nzambe ezalaka libombami. Mpe moto nyonso, mobali to mwasi, asengeli koluka mokano ya Nzambe mpo na ye moko, libombami na Nzambe.

¹⁷ Ndenge nini toyebaka yango? Polo, yango emonisamaki epai na ye. Alobaki ete atunaki tolí na moto moko te, mosuni mpe na makila moko te. Akotaki na kelasi moko te, na séminaire moko te. Azalaki na eloko moko te ya kosala ná yango. Kasi a . . . Emonisamelaki ye na Yesu Klisto, Oyo akutanaki na ye na nzela ya Damaseke, kati na—na Polé lokola Likonzi na Móto, mpe Ebengaki ye. Mpe akendeki na Arabia, mpe afandaki kuna mibu misato. Oh, bobanzi te ete ezalaki ntango moko kitoko, boye te, Ndeko Egan? Mibu misato, Polo azalaki kuna na Arabia, amifutelaki mwa ndako na esika moko boye, kotambola komatakokita na ndako yango, ná babúku nyonso ya kala. Bazalaki na babúku ya sika te; Polo moto akomaki yango, mingi koleka na yango. Kati na ba-búku yango ya kala, lolenge Nzambe yango, na ebandeli, abongisaki biso liboso mpo na Bomoi na Seko. Lolenge Akotinda Yesu, ete na nzela na Mbeka oyo, biso nyonso tokózua ndingisa na Nzete na Bomoi. “Baoyo Ayébáki liboso, Abengaki bango; baoyo Abengaki, Asili kolóngisa bango; baoyo Alongisaki, Asili kopesa bango nkembo.” Nzambe, uta

ebandeli ya mokili, abongisaki biso liboso mpo na kotياما lokumu ya bana. Sikoyo bikelamo nyonso ezali kokimela, kozela komonana ya bana na Nzambe. Oh, nazobanza mpenza ete Polo alekisaki ntango ya malamumu mingi. Nalingaki kosepela kozala kuna elongo ná ye. Bino mpe, boye te?

¹⁸ Sikoyo, alobaki ete: “Asilaki komonisa biso libombami yango.” Tika ete Molimo Mosanto ésimba yo, na ntango moko, mpe óbanda kotánga Yango, okomona ndenge Yango esalaka. Nsima na nzánga oyo, nazuaki, oh, pene na miniti ntuku misato mpo na koyekola, kaka mpo na kobwaka miso na liteya yango; ntango mosusu te, nákoloba ndambo na yango, minítí zomi na mitano, katikati na ba-ntango. Mpe nabandaki kotánga, mpe namilobelaki: “Libombami, oyo mpenza libombami!” Mpe Likomi yango ezongisaki ngai na Kondimana na Kala, na nsima, kozonga lisusu na Kondimana na Sika; ekangamaki na eloko moko, bomoni libombami ya Boyei na Ye, libombami ya mokano na Ye, libombami ya biso kofandáká elongo. Bómikanisela, ekoki koteyama na likindo moko te. Ezali libombami. Okoki koyeba yango na mayele ya kelasi to ya likindo te. Ezali libombami oyo ebombámá uta kozalisama ya mokili, kozeláká komonana ya bana na Nzambe.

¹⁹ Yebisa ngai, ndeko na ngai ya mobali, yebisa ngai, ndeko na ngai ya mwasi, ezalaki ntango nini oyo bana na Nzambe basengelaki mpenza komonana libanda na ntango oyo? Ntango nini etikálá kozala, na histoire, oyo basengelaki kotalisa ntango ya kosikola bokeli nyonso? Bokeli, bokeli yango moko ezali kokimela, ezali kozela ntango ya komonana. Ee, liboso ete bolimbisi ya masumu ésalema, liboso ete Molimo Mosanto étikala kosopama, liboso ya Kondimana na Kala mo—mobimba, kuna, komonana ekokaki kosalema te. Esengelaki kozela kino na ntango oyo. Sikoyo makambo nyonso ememami, ekomi, kozua lolenge ya libanga ya motó, na komonana ya bana ya Nzambe, oyo bazali kozonga, mpe Molimo na Nzambe ezokóta kati na bato oyo, na lolenge ya kobonga be mpenza, kino lotómo na bango ekokóma mpenza pene lokola oyo ya Klisto, kino ekosangisa Ye ná Lingomba na Ye elongo.

²⁰ Bato boni basilá koyekola histoire ya ba-pyramide? Nabanzi, ntango mosusu mwasi moko, awa, atomboli loboko. Malamumu.

²¹ Nzambe akomá ba-Biblia misato. Moko na yango ezalaki Zodiaque na likoló, yango nde Biblia ya liboso. Moto asengelaki kotombola miso mpo na kosósola ete Nzambe azalaka na likoló. Bólanda Zodiaque, bosílá koyekola yango? Epesaka kutu eleko moko na moko, ata eleko ya Cancer. Epesaka ebandeli, ya libos- . . . mbotama ya Klisto. Elilingi ya liboso na Zodiaque ezali nini? Mongondo. Elilingi ya nsuka ezali nini? Leo nkosi. Boyei ya liboso mpe Boyei ya mibale ya Klisto, nyonso wana ekomámá kuna na kati.

²² Na nsima, Biblia oyo elandi ekomamaki na libanga, babengaki yango “ba-pyramide.” Nzambe akomaki kati na ba-pyramide. Soki boyekoli yango, soki boyekoli ba-histoire ya kala mpe ya bitumba, bokomona ndenge etongamaki liboso ya libebisi ya mpela.

²³ Ya misato ekomamaki na lokasa, Biblia, mpo na mokili ya bato ya mayele, ya mayele mingi, oyo elingaki koya na nsima. Sikoyo, ndenge Nzambe asili kotambola kati na bileko, tokómi na oyo ya Leo nkosi. Tokómi na ntango ya kotiana libanga ya motó likoló ya pyramide. Tokómi na Buku ya Emoniseli, na mokapo ya nsuka. Science elobi ete etikali miníti misato liboso na minwí. Oh, bókanisa esika oyo tokómi.

²⁴ Bótala, tózua pyramide, ezali pete. Lolenge na yango ezalaka lokola triangle.

²⁵ Ntango tozalaki awa na nsé kobanda na ebandeli ya eleko ya lingomba, nsima na Réforme na ntango ya Luther, kaka mpo na moto koloba ete azalaki Moklisto, elakisaki bomoi to kufa na ye. Bakoboma ye mpo alobi ete azalaki Moklisto. Yango wana, koleka na minyoko. . . Na bileko nyonso, na ntango nyonso, minyoko ezalaká. “Baoyo nyonso babikaka na bosantu kati na Klisto Yesu bakonyokwama.” Na eleko ya Luther, ezalaki nsómo koloba “Luthérien.” Bazalaki komona yo moto moko fanatíki, mpe bakokaki koboma yo. Mbala mingi, bazalaki koboma bango likolo na etumbelo ya móto ya nkóni, kotumba bango, mpe makambo nyonso mosusu, mpo bazalaki ba-Luthérien.

²⁶ Na nsima, lingomba ekómaki moke, lokola pyramide. Ekotaki na etape mosusu ya ngolu, elingi koloba kobulisama. Eleko ya Wesley, ntango atelemelaki lingomba Anglicane, ntango ateyaki malakisi ya kobulisama. Ekómaki lisusu moke koleka, na bongo, babengaki bango etónge ya ba-fanatíki.

²⁷ Bato boni bazali awa, baoyo bazalaki ba-Methodiste, to bazaláká, to bazalaki na ntango moko kosambela na lingomba Methodiste? Ndambo na bino awa. Boyebaki ete lingomba Methodiste ekómaki pene na kozua Molimo Mosanto na ntango moko boye? Nakendé na mangomba ya ba-Methodiste mpe namóná bango kokweya na nsé, kobwakela bango mai na elongi mpe kopepa bango mopepe, kopekisa Molimo Mosanto kokweya likoló na bango. Ya solo. Sikoyo, ezali ya solo, kuna, na bangomba ya Kentucky, tozalaki na ba-Methodiste. Bino bozali bandimi ya lingomba, awa. Biso tozalaki na ba-Methodiste, kuna, ná ba-Batiste. Tozalaki kofukama na etumbelo mpe kosimbana na mokongo, kino tózua eloko moko. Ntango tosilisi, tokómaki kobika ndenge mosusu, nsima na yango.

²⁸ Kasi bino, boyaka kaka kokomisa nkombo na buku mpe koloba: “Nakómi Methodiste.” Mpe bakozua etiyelo ya mungwa, bamwangiseli yo mwa mai, mpe esuki wana. Obimi libanda mpe okobi kolata bakupé, kopakola-pakola, kosala ba-course

ya mpunda, kobeta lotó, kobeta masano ya mbongo, kobeta ba-machine ya mbongo ná makambo nyonso mosusu, kasi bozali kaka ba-Methodiste malamú, bomoni. Oyo wana ezali ba-Methodiste te. Bazali kaka bandimi ya lingomba. Ezali solo. Batiste, ndenge moko, Presbiterien, ná bamosusu nyonso, ndenge moko.

²⁹ Ndenge David duPlessis alobaki: “Bankóko, Nzambe azalaka na bankóko te.” Nzambe atikálá kozala na nkóko te. Azali nde na bana, kasi bankóko te. Ya solo. Bino. . . mpe bato oyo bakotaka na lingomba Methodiste, to na lingomba Pantekotiste, to na lingomba Batiste, mpo mama to tata na yo azalaki Pantekotiste to Batiste, na bongo ozali nkoko. Bango bazalaki bana. Yo ozali nkoko, bomoni. Boye, Nzambe azalaka na eloko moko ya ndenge wana te. Lingomba ezali na ebele na yango, kasi te—kasi te—te—te . . . Nzambe te.

³⁰ Sikoyo, bótala oyo, ekobaki ndenge wana kino sikoyo, wana ekómi motango moke, lingomba. Eleko ya ba-Pantekotiste eyaki. Na ntembe te yango elongolaki mpenza makambo mingi. Na nsima yango esalaki nini? Etikaki ba-Methodiste ná ba-Luthérien nyonso na nsima.

³¹ Sikoyo Molimo Mosanto ekobaki kokende liboso mosika na eleko ya ba-Pantekotiste. Basalaki nini? Bakómaki ebongiseli, bamikómisaki bongo: “Biso tozali ba-Assemblée de Dieu.” “Biso tozali ba-Unitaire.” “Tozali ba-Binitaire.” “Tozali Eglise de Dieu.” “Tozali *oyo to oyo kuna*. Okoki kozala mondimi te, okoki kokóta na Lola te soki nkombo na yo ekomami na buku na biso te.” Oh, oyo mpenza boléma! Etali ngai te soki ozali Batiste, Methodiste, Presbiterien, nkombo na yo etiami na Buku ya Bomo ntango Nzambe atii yango kuna na kati. Soki osila kobongisama liboso mpo na Bomo ya Seko, Nzambe akobenga yo na ndenge moko boye, na lolenge moko boye, na lolenge moko—moko to mosusu. Na ntembe te Akosala yango. “Baoyo nyonso Tata asili kopesa Ngai bakoya epai na Ngai.” Ata osambelaka na lingomba nini, etali yango na eloko moko te. Kasi ebongiseli ekosala ata eloko moko te mpo na yo, kasi ekoki kotia yo nkaká mingi mpo na kokóba kotambola ná Nzambe, kasi eko—ekosala eloko mosusu ata moke te. Ekosangisa yo elongo na etonga ya bandimi mpe bazangi kondima. Na ntembe te, okokutana na yango bipai nyonso okokende, kútu bazalaki na yango na Likoló. Boye, ezali mabe te, kasi ozali nde kotala denomination na bino. Tala nde epai na Yesu, Ye azali Oyo ya kotalela.

³² Sikoyo, lokola tozali kokóma na . . . bazalaki na . . . Bato boni . . . Nabanzi mwasi oyo awa atombolaki loboko, ete oyekolaki ba-pyramide. Boyebi, pyramide yango, batikálá kotia yango motó te, boye te? Batikálá kozala na libanga ya motó likoló na yango te. Batikálá te, bakokaki komóná kutu yango te. Bayebi ata likambo oyo ekómelaki yango te. Mpo na nini? Mpo na nini libanga ya motó etiamaki likoló na yango te, libanga ya

motó, likoló na yango? Mpo Aboyamaki, ntango Ayaki. Azalaki Libanga oyo eboyamaki. Ya solo. Kasi ekotiama likoló na yango. Ya solo. Na nsima, mabanga oyo ekoyamba Libanga ya motó yango, mabanga yango esengeli kozala mpenza lokola Libanga yango, oyo ekofanda malamú mpenza, ekosangana na bisika—bisika nyonso. Pyramide yango ebongi mpenza be, na lolenge ete okoki kolekisa jiléte na kati na yango te, na bisika oyo mabanga yango ekutani. Mosala kitoko ya botongi. Mosusu kati na yango ekoki kozala na bozito ya ba-tonne nkama na nkama, kuna na likoló, mpe esangisami mpenza malamú be.

³³ Yango nde lolenge oyo Nzambe azali komema Lingomba na Ye. Tozali kosangana elongo mpenza, na motema moko mpe na boyokani moko. Sikoyo moto moko akoloba: “Ee, ba-Lutherien, kalakala, bazalaki na eloko moko te.” Bóndima yango ata moke te. Ba-Lutherien mpe bakozala na lisekwa, kaka ndenge moko na baoyo nyonso batikali bakozala na lisekwa. Ba-Batiste, ba-Presbiterien, mpe bana nyonso ya Nzambe, bakobima na lisekwa wana. Mpe yango nde ntina oyo lelo, bato balobaka: “Oh, ee, ekozala na kolamuka moko ya monene oyo ekoya mpe ekobikisa ba-Pantekotiste milió mokámá. Bango nyonso bakobikisama mpe Konétolama ekosalemea.” Bozali na libunga. Konetolama wana ekozala na bato nkóto nkama na nkama, ya solo, kasi bakouta na mibu nkóto motoba ya lobiko mpe, mibu nkóto motoba oyo euti koleka. Moto atambolaka kati na Polé ndenge Polé yango eyaka epai na ye, akatisaka ba-gbagba yango ntango akómaka liboso na yango. Sikoyo, soki aboyi Yango, na bongo akotikala na molíli. Kasi soki akobi kokende liboso!

³⁴ Sikoyo, bótala, na bongo Boyei ya Nkolo Yesu ekómi mpenza pene kino Molimo oyo ebandaki na nsé awa. . . mwa moke na kolóngisama, kobulisama, libatisi ya Molimo Mosanto, mpe sikoyo tokómi mpenza na ntango ya boyei ya Libanga ya motó. Lingomba esengeli mpenza kokóma lokola Klisto na lolenge ete Klisto ná Lingomba bákoka kosangana elongo, bákóma Molimo moko. Mpe soki Molimo na Klisto ezali kati na yo, Ekosala ete óbika bomoi ya Klisto, óbikela bomoi ya Klisto, ósala misala ya Klisto. “Ye oyo akondimaka Ngai, misala mizali Ngai kosala akosala yango mpe lokola.” Yesu alobaki bongo. Bomoni? Sikoyo tokozua, tozali na lotómo moko oyo ekoya, oyo ekozala mpenza lokola bomoi ya Klisto. Lotómo yango ezali kotalisa nini? Boyei ya Nkolo.

³⁵ Bótala mokili lelo, mpe bótala malamú makambo Khrouchtchev azali koloba, makambo nyonso mosusu ya minene oyo, ná kowelana minene na mokili mobimba oyo ekoki kosalema, na ngonga ata nini, nyonso ekoki kokóma putulú na seconde moko. Ya solo. Mpe soki yango, toyebi ete ekomi pene. Moto nyonso oyo azali na lisosoli akoki kotánga zulunále to koyoka radio, mpe koyeba ete yango ekomi pene. Ee, bóbosana te, Klisto akoya kozua Lingomba na Ye liboso likambo yango

ésalema. Boye, Boyei ya Nkolo Yesu ekomi pene boni? Ntango mosusu liboso ete liyangani oyo ésila, na mpokwa oyo. Tokómi na ntango ya nsuka. Ya solo mpenza.

³⁶ Bótala lingomba malamú, wana ezali koya, wana ezali kokóba. Bótala yango na makanisi na bino moko, bino ba-historien oyo boyekolaka histoire. Bótala lingomba Lutherien, na ntango ya kolongisama, eutaki mpenza kobima sika na Bokatoliko, bótala yango kokóba. Na nsima, bótala Wesley, ndenge apusanaki mwa pene koleka, na ntango ya kobulisama, kokótáká na bozindo mwa moke koleka na kati ya Makomi. Bótala mpenza na kati-kati na yango, eleko ya Wesley. Na nsima eloko oyo elandaki, ezalaki eleko ya ba-Pantekotiste. Eleko ya ba-Pantekotiste ná bozongisi ya makabo, makabo ya molimo. Sikoyo, bótala eleko oyo ezali koya sikoyo komata kino na Libanga ya motó. Bomoni oyo nalingi koloba? Boyei na Nkolo, koyebana na yango. Nzambe mpe bikelamo nyonso bazali kozela ete lingomba ézua esika na yango.

³⁷ Kpokoso lelo ezali ete, ngai...pene na bato nyonso oyo nakútáná na bango. Babimisaki ngai, na kiti ya bibosono, tozalaki kozua...Nasengeli kotalisa nzoto na monganga, boyebi, soki tolingi kokende na mboka ya bapaya, bino bamiissionnaire ná bamosusu, boyebi yango. Ntango nazalaki kotalisa nzoto, babimisaki ngai libanda ya chambre wana, nautaki komela lolenge wana ya...mpo na ngai, ezalaki lokola potopóto, to farine, to eloko moko boye, mpe na—nautaki komela yango. Mpe nabimaki kuna, nafandaki, nazelaki ndambo ya ngonga mpo báyebe soki ebimaki na estomá na ngai to te. Nabwakaki miso kuna, mpe mwasi moko azalaki kuna, emonanaki lokola ete akómaki pene na liwa. Akómaki mpenza...makolo ekóndá mpe maboko ekóndá. Mpe nakobaki kopusana, longwa na moto oyo kino na moto oyo wana, longwa na moto oyo kino na moto oyo wana, kopusanáká pembeni na ye koleka, kino nakómaki na esika oyo ye mwasi yango azalaki. Amonanaki lokola ete akómaki pene na liwa. Mpe napusanaki pene na ye, nalobaki: “Limbisa ngai, madame.”

Alobaki: “Nsango nini?” Oh, azalaki mpenza kobela makasi!

Nalobaki: “Likambo ezali nini?”

³⁸ Alobaki: “Nakendeki kotala mwana na ngai ya mwasi na Tucson. Nabelaki, bazokoka koyeba te soki ezali nini.”

³⁹ Nalobaki: “Nalingi nátuna yo likambo moko.” Nalobaki: “Nazali motei ya Nsango-malamu. Ozali Moklisto? Obelemi mpo na kokende soki ngonga yango ekomi?”

Alobaki: “Nasambelaka na lingomba *songolo-pakala*.”

⁴⁰ Nalobaki: “Oyo wana ezali motuna natuni te. Ozali Moklisto oyo atondi na Molimo ya Nzambe mpe obelemi mpo na kokende ntango Ye akobenga yo?” Mwasi yango ayebaki ata likambo

nazalaki kolobela te. Bomoni? Oh, mawa mingi, komona ndenge mokili ekómi!

⁴¹ Sikoyo, “Ayebisaki biso mabombami ya mokano na Ye,” boyei. . . Bótika nátángela bino likambo moko. Nazalaki kotánga na. . . Tózua sikoyo esika balobeli “libombami ya Mokano na Ye.” Tózua na Baebete awa mwa miniti moko, mokapo ya 7 ya Baebete, nabanzi ezali yango. Mpe nakolinga kotángela bino likambo moko oyo ekoyokisa bino malamumu mpenza, ntango tokanisaka ete tofandi elongo na bisika ya Likoló. Baebete, mokapo ya 7.

*Mpo ete Melekisedeke oyo, (Sikoyo, bótala malamumu.)
mokonzi ya Saleme, nganganzambe ya Nzambe oyo-aleki-likoló. . .*

⁴² Libombami yango ezali nini sikoyo? Libombami yango, yango oyo, bótala likambo oyo malamumu. Moto yango azali Nani, “komeka kotalisáká libombami ya mokano na Ye,” Melekisedeke oyo? Nazozela ete moto nyonso ákóma awa, bamosusu bazali naino kobalola nkasa ya Biblia. Baebete, mokapo ya 7, Polo azali koloba, moto yango moko ya Bagalatia.

*Mpo Melekisedeke oyo, mokonzi ya Saleme,
nganganzambe ya Nzambe oyo-aleki-likoló, . . .
akutanaki na Abraham ntango autaki koboma bakonzi,
mpe apambolaki ye;*

Na oyo mpe Abraham apesaki eteni, moko na zomi ya biloko nyonso; azali liboso ndimbola, na ndimbola, Mokonzi ya boyengebete, . . . nsima na yango. . . Mokonzi ya Saleme, (Moto yango azali Nani?) elingi koloba, Mokonzi ya kimia;

Ná tata te, ná mama te, ná etangeli ya mabota te, ná ebandeli ya mikolo te, to nsuka ya bomoi te; . . .

⁴³ Moto oyo azalaki Nani? Ye azalaki Nani? Atikálá kozala na tata te, Atikálá kozala na mama te, Atikálá kozala na ntango oyo Abandaki te, to kozala ata moke te na ntango oyo Akotikáláká kokufa. Akutanaki na Abraham ntango autaki koboma bakonzi. Azalaki kosala nini? Akendeki kozua Lota, ndeko na ye oyo abungaki, mpo na kozongisa ye. Mpe abomaki bakonzi; baoyo bakonzi yango basilaki koboma; nabanzi bakonzi zomi to zomi na mitano, ná ba-bokonzi na bango. Kasi Abraham apesaki mandóki na basali na ye mpe bakendeki kozua ye, akabolaki bango na butu, bomoni, ntango azuaki ye, na butu. Oh, ndeko, tozosala mosala na molílí sikoyo, Polé bobete moko tozali na yango, ezali Polé ya Nsango-malamumu. Kasi akabolaki bango, mpe azuaki ye mpe azongisaki ye. Mpe wana na nzela na ye ya kozonga, nsima na etumba kosila!

⁴⁴ Tókende na Genese 14, kaka mwa miniti, mpo na kokómisa likambo yango polele koleka. Tókende awa na Genese, ya min-. . . nabanzi ezali 14, Genese 14. Iyo, tózua Genese 14:18,

mpo na kobanda. Tóbanda mwa moke liboso na yango. Tóbanda, iyo, na molongo ya 18, Genese 14:18: “Melekisedeke . . .” Sikoyo, wana ezali Abraham na bozongi na ye ya koboma bakonzi. Azalaki kozonga, na nzela na ye ya kozonga, kozongisá Lota, ná bato nyonso oyo bamemamaki. Bango nyonso!

⁴⁵ Ndenge David, oyo akendeki kozua . . . David asalaki nini? Azuaki mwa bilingóngo, akendeki mpe abótolaki mwana-mpate yango na monoko ya nkosi. Bókanisa naino bilingóngo, kokende kokangola mwana-mpate. Nani na mokili akosala yango? Bóyebisa ngai moto nani awa akoki kosala yango, tombola loboko. Nakoyebisa yo na mbala moko ete ozali na libunga. Bomoni ngai kotombola oyo ya ngai te. Te, nakokende te kokangola ye ná bondóki ya 30-06, na mpasi. Kasi ye akendeki kokangola ye ná bilingóngo, mwa eteni ya loposo ya nyama, ezalaki na singa mibale, azalaki kobalola-balola yango. Mpamba te . . . Mpe ntango Goliath abandaki kotúta ntólo, alandaki Goliath, mpe alobaki: “Nzambe ya Likoló asilaki kopésá ngai nzela ya kokangola mwana-mpate na monoko na nkosi, na monoko ya ngombolo.” Ayebaki ete ezalaki bilingóngo te. Ezalaki nguya na Nzambe oyo ekendaki elongo ná ye. Ye azalaki Moto oyo azongisaki mwana-mpate yango.

⁴⁶ Mpe yango nde tozali koloba lelo. Nzambe azali na ba-David zingazinga, iyo misie, baoyo bazali koleisa bampate ya Tata. Mpe mbala na mbala, tumeur moko ekoya, to cancer moko ekoya, to likambo moko, mpe ekokweya na maboko ya monganga. Yango ekopekisa Dawidi wana te, akokende kuna mbala moko mpo na kozua mpate yango, ná mwa bilingóngo, ya: “Senga ata nini na Nkombo na Ngai, ekopesamelama.” Etali ngai te soko minganga bakoki koseka, mpe bato mosusu nyonso bakoki kotiola ye, akokende koluka ye, ata bongo, mpo na kozongisa mpate yango na lopango. Iyo, misie. “Azali mwana na Nzambe, longóla loboko na yo likoló na ye!” Abambaki nkosi yango na mabelé, nkosi yango etelemaki, akangaki yango na mandefu mpe abomaki yango; mwana mobali moko ná loposo ya mwa motane, ntango mosusu ná bozito ya kilo ntuku misato to ntuku minei.

⁴⁷ Bótala malamumu. Melekisedeke, Mokonzi ya Saleme, elingi koloba Mokonzi ya Kimia, na bosolo, Saleme ezali na ngámbo mosusu ya ngomba. Mokonzi ya Yelusaleme, nde Nani oyo ezalaki. Yango nde mpenza Nani oyo ezalaki, Mokonzi ya Yelusaleme. Yelusaleme yango, ezalaki liboso kobengama Saleme, elingi koloba kimia; yango nde Yelusaleme ezalaki liboso, yambo ete ébengama Yelusaleme. Azalaki Mokonzi ya Yelusaleme. Azalaki Mokonzi ya boyengebene, Mokonzi ya kimia, Mokonzi ya Saleme. Azalaki na tata te, Azalaki na mama te, Azalaki na ebandeli ya mikolo te, Azalaki na nsuka ya bomoi te, Azalaki na kokitana moko te. Oh, oh, oh! Mobali oyo azali Nani? Bótala Ye malamumu. Nsima na etumba kosila,

nsima na kozua elóngá, bóyoka malamú likambo oyo Ye alobaki. “Melekisedeke,” molongo ya 18, mokapo ya 14, Genese.

Melekisedeke, mokonzi ya Saleme, abimisaki lipa mpe vínyo, mpe ye azalaki nganganzambe ya Nzambe oyo-aleki-likoló.

Apambolaki ye, mpe alobaki ete: Abram ápambolama na Nzambe oyo-aleki-likoló, mozalisi na likoló mpe mabelé:

Mpe Nzambe oyo-aleki-likoló ápambolama, ye oyo asili kokaba bayini na yo na loboko na yo. Mpe apesaki ye moko na zomi ya biloko nyonso.

48 Tika ete tótánga moke liboso koleka.

Mokonzi ya Sodome alobaki na Abraham ete: Pesa ngai bato, yo kamata biloko ya motuya mpo na yo moko.

Abram alobaki na mokonzi ya Sodome ete: nasili kotombola loboko na ngai epai na YAWÉ, Nzambe oyo-aleki-likoló, mozalisi na likoló mpe mabelé, (Bóyoka ndenge akataki yango na mokuse, hmm, ndenge alobelaki ye yango!)

Ete, nakokamata eloko moko te na yango ezali na yo, ata ndambo na busi te, to singa ya sapato te, eloko moko te oyo . . . mpo óloba te ete, oyo ya yo, mpo óloba te ete: Ngai nde nakómisi Abram mozui:

Longola bobele oyo bilenge mibali basili kolia . . .

49 Bótala, Melekisedeke oyo, na ntango kaka Akutanaki na Abraham oyo azalaki kouta na kobomama ya bakonzi. Libombami na Nzambe ebandi sikoyo koyebana! Nani Ye azalaki? Moto moko te . . . Bakokaka kokundola histoire na Ye moko te, mpamba te Azalaki na tata te, Azalaki na mama te, Atikálá kozala na ntango oyo Abandaki te, Atikálá kozala te na ntango oyo Atikálá kokufa, na bongo, boye ézala nyonso Oyo Ye azalaki, azali naino na bomoi. Atikálá kozala na ebandeli te, boye, Akokaki kozala moto mosusu te, bobele El, Elah, Elohim; azali-kobika-na-Ye-moko, azali-koumela-na-Ye-moko, Nzambe na-Nguya-nyonso!

50 Yesu azalaki na Tata, Yesu azalaki na mama; Yesu azalaki na ebandeli ya mikolo, Yesu azalaki na nsuka ya bomoi na mokili oyo. Kasi Mobali oyo azalaki na tata to mama te, amen, tata te mama mpe te. Yesu azalaki na Tata mpe mama. Mobali yango azalaki na tata te mama mpe te. Amen. Mpe Asalaki nini, nsima na etumba kosila, nsima na Abraham kozua esika na ye?

51 Nsima na Lingomba kozua esika na Yango, tobengami na kotiyama lokumu ya bana, na nzela na Molimo Mosanto. Mpe ntango moto nyonso akozua esika na ye, mosala oyo Nzambe abéngá ye kosala, mpe kotelema ngwi kino na nsuka ya nzela, koluka baoyo babungi.

52 Liboso, Polo alongoli bango kobanga nyonso, boye: “Soki obengami, soki omisaleli te, na makanisi na yo, na nzela ya théologie moko boye, soki obotami mpenza na Molimo, na bongo, Nzambe abongisaki yo liboso, liboso na kozalisama ya mokili, Atiaki nkombo na yo na Buku ya Bomoi ya Mwana-mpate, mpe sikoyo tosangani mpo na kofanda na bisika ya Likoló kati na Klisto Yesu. Libota ya bulee, ekólo ya bulee, libota liponami, bonganga na bokonzi, kopesáká ba-mbeka ya molimo epai na Nzambe, elingi koloba, mbuma ya bibebu na biso kopesáká masanzoli na Nkombo na Ye.”

53 Bato bayaka awa mpe balobaka: “Bato wana bazali liboma.” Na ntembe te bazali yango; bwanya ya Nzambe ezalaka bolémá mpo na moto, mpe bwanya ya moto ezalaka bolémá mpo na Nzambe. Ekeseni, moko ná mosusu.

54 Kasi lingomba oyo etondisami mpenza na Molimo, etondá na nguya ya Nzambe, efandi elongo na bisika ya Likoló, kopesáká ba-mbeka ya molimo, masanzoli na Nzambe, Molimo Mosanto ezali kotambola katikati na bango, kososola masumu mpe kotalisa polele makambo ya mabe oyo ezali katikati na bango, esembolami mpe kokomisa yango na molongo mpe alima. Mpo na nini? Ntango nyonso Liboso na Nzambe, Mbeka ya makila wana ezali.

55 Sikoyo, bómikanisela, tolobelaki yango na ntongo ya lelo. Bobikisamaki na Makila te, *botikali* ya kobikisama na nzela ya Makila. Kasi bosilaki kobikisama na ngolu, na nzela ya kondima, na kondimáká Yango. Nzambe abetaki na ekuke ya motema na yo mpo Abongisaki yo liboso. Otombolaki miso mpe ondimaki yango, mpe oyambaki yango. Sikoyo Makila ezali kolongola masumu na yo. Bómikanisela, nalobaki: “Nzambe akweisaka mosumuki te mpo asali lisumu.” Azali mosumuki, mpo na kobanda. Akweisaka nde Moklisto mpo asali lisumu. Na nsima, lokola Asili kokweisa ye, Klisto azuaki kokweyisama na biso. Boye, kokweisama ezali te, mpo na baoyo bazali kati na Klisto Yesu, baoyo bazali kotambola engebene na nzoto te, kasi engebene na Molimo. Mpe soki osali likambo moko ya mabe, osali yango na nko te. Osalaka masumu na nko te. Moto oyo asalaka masumu na nko, oyo abimaka kokende kosala masumu na nko, akoti naino na Nzoto yango te. Kasi moto oyo akoti kuna, asili kokufa, mpe bomoi na ye ebombami kati na Nzambe, na nzela ya Klisto, atiami elembo na Molimo Mosanto, mpe zaboló akoki ata komona ye te, azali mpenza mosika na kati. Akosengela kobima kuna, liboso ete zaboló ákoka kozua ye. “Mpamba te bosili kokufa!”

56 Yebisa mokúfi ete azali moto na bilongi mibale, mpe tala eloko nini ekosalema. Beta ye kisambéti na mopanzi mpe loba: “Yo moto na bilongi mibale oyo,” akoloba ata liloba moko te. Ya solo, akotikala kaka ya kolála wana.

57 Mpe moto oyo akufi kati na Klisto, okoki kobenga ye moto na bilongi mibale, kopesa ye nkombo nyonso olingi, akotikalá kozongisa eloko moko te. Soki asengeli kosala likambo moko, akomibenda na esika moko mpo na kobondela mpo na yo. Ezali solo. Kasi, oh, bamosusu kati na bango bazali mpenza na bomoi. Yango nde likambo oyo ngai nakanisaka, tosengeli kokunda bato oyo bakufi. Baoyo bakufi kati na Klisto, tokundaka bango na mai. Mbala mingi, tokundaka bato mingi mpenza oyo bazali na bomoi, nkanza mpe kowelana mingi mpenza, mpe bazali mingi mpenza na kati ya lingomba. Kasi biso tokoki kokabola yango te, kasi Nzambe nde akabolaka. Ayebi bato na Ye. Ayebi bampate na Ye. Ayebi mongongo moko na moko. Ayebi bana na Ye. Ayebi nani Ye akoki kobenga ábima, Ayebi nani Ye abongísá liboso. Ayebi na nani Ye asilaki kopésa makambo oyo, na nzela nini Ye azomitalisa Ye moko. Lolenge Ye . . . Nzambe akoki kotiela bana na Ye motema, na oyo basengeli kosala, koyebáká ete bakosala yango mpenza ndenge esengeli.

58 Bondimi ete Nzambe asalaka bongo? Ee, Satana alobaki na—na Yobo mokolo moko . . . alobaki na Nzambe mokolo moko: “Iyo, Ozali na mosali moko.”

59 Nzambe alobaki: “Moko te na mokili azali lokola ye. Azali moto oyo abongi be.” Atielaki ye motema.

60 Satana alobaki: “Oh, iyo, makambo nyonso ezali pete mpo na ye. Pesa ngai nzela ya kozua ye mwa moke, mpe nakosala ete álakela Yo mabe na miso na Yo.”

61 Alobaki: “Azali na maboko na yo, kasi kozua bomoi na ye te.” Bomoni? Mpe asalaki nyonso, longola bobele kozua bomoi na ye.

62 Kasi, oh, Yobo, na esika ya . . . asalaki nini? Alakelaki nde Nzambe mabe, ntango Nzambe azuaki bana na ye, ntango asalaki ye makambo ya mabe nyonso oyo, mpe nyonso wana? Yobo atiaki ntembe te. Akweyaki na elongi na ye mpe akumbamelaki. Aleluya! Alobaki: “Yawe apesaki mpe Yawe alongoli, Nkombo na Yawe é sanzolama!” Yango mpenza.

63 Nzambe ayebaki kotia motema na Ye na Yobo. Nzambe ayebi boni Akoki kotiela yo motema. Ayebi boni Akoki kotiela ngai motema. Kasi likambo tozali kolobela sikoyo ezali kotia mwana oyo na esika na ye.

64 Sikoyo, ntango Biblia . . . Ntango etumba esili nyonso, ntango makambo nyonso esili, na bongo likambo nini elandaka oyo tosalaka? Likambo nini tosalaka nsima na etumba kosila? Boyebaki nini oyo tosalaka? Tokutanaka na Melekisedeke. Tózua Matai 16:16, noki-noki, mpo tóyeba soki ezali bongo to te. Santu Matai, mokapo ya 16 mpe molongo ya 16. Nandimisami ete ezali yango, Matai 16:16. Matai motob- . . . Te, ezali yango te, ekoki kozala pene bongo te. 26:26. Oh, 16, awa, Azali kosolola na Simona Petelo; bólimbisa, nalingaki koloba bongo te. 26:26, mpamba te ezali elambo ya nsuka, yango nde nazali koluka.

Matai, mokapo ya 26 mpe molongo ya 26. Sikoyo tozui yango, yango oyo, na elambo ya nsuka.

Ezalaki bango kolia, Yesu akamataki lipa mpe, apambolaki yango, abukaki yango, mpe apesaki yango na bayekoli na Ye, mpe alobaki: Bózua, bólia; oyo ezali nzoto na ngai.

Akamataki mpe kopo, mpe apesaki matondi, mpe apesaki bango yango, alobaki: Bómela yango, bino nyonso;

Mpo ete oyo ezali makila na ngai, ya kondimana na sika, mpo na, oyo esopani mpo na bato mingi, mpo na kolimbisa masumu (m-a-s-u-m-u, masumu, Baklisto oyo basalaka makambo ya mabe).

65 Malamu, “Kasi—kasi . . .” Bóyoka, molongo ya 29.

. . . nazali koloba na bino ete, Nakomela lisusu mai ya mbuma na miwiti te, kino mokolo wana ntango nakomela yango ya sika elongo na bino na bokonzi ya Tata na ngai.

66 Nini? Likambo yango moko oyo Melekisedeke asalaki, nsima na Abraham kozua esika na ye. Atiaki bato na ye na molongo, mpe alóngaki etumba, mpe autaki kozonga na ndako, mpe Melekisedeke ayaki na lipa ná vinyo. Nsima na etumba kosila, bongo tokolia Elambo ya Libala elongo ná Nkolo Yesu, na mokili ya sika. Oh, Nkombo na Nkolo épambolama. Malamu.

67 “Mabombami ya mokano na Ye, kokokana na mwango na Ye,” sikoyo tózonga lisusu na Baefese, 9, “oyo Asili kobongisa kati na Ye moko.”

Mpo, ntango ngonga yango ekokoka . . .

68 Mpe bóbósana yango te, touti komona yango. Baefese, mokapo ya 1, molongo ya 10.

Mpo, ntango ngonga yango ekokoka . . .

69 Sikoyo, toyekolaki ete, mpo ngonga yango ékoka, ezali kozela nini? Ngonga yango ekokoka, ntango oyo lisumu ekosila, ntango oyo liwa ekosila, ntango oyo bokono ekosila, ntango oyo lisumu ekosila, ntango oyo mabebisi nyonso (makambo ebebisami wana, oyo zabolo asili kobebisa) ekosila, wana ntango yango moko ekosila. Bótala malamamu.

Mpo, na eleko ya litondi ya ngonga yango ekokoka, ákoka kosangisa . . . biloko nyonso esika moko kati na Klisto, biloko oyo ezali na likoló, mpe biloko oyo ezali na mabelé; na nsé na bokonzi na ye:

70 “Kosangisa biloko nyonso na nzela na Klisto.” Ndenge nalobaki na ntongo oyo, biloko mikemike ya motuya nyonso oyo tozali komona, biloko mikemike ya nkembo oyo, bokoki kongengisa yango na Genese, bokoki kongengisa yango na

Esode, bokoki kongengisa yango na Lewitiko, mpe komema yango kino, mpe na Emoniseli, ekosuka nyonso kozala Yesu. Bózua Joseph, bózua Abraham, bózua Yisaka, bózua Yakobo, bózua Dawidi, bózua ata eloko ya motuya nini kati na bango, kati na bato ya Nzambe wana, mpe bótala soki bokomona Yesu Klisto kotalisama te, kati na moko moko na bango. “Mpo Ákoka kosangisa biloko nyonso kati na Moko, Yesu Klisto.”

71 Sikoyo, mwa moke liboso sikoyo, sikoyo molongo ya 11.

Kati na ye, tokómi mpe basangoli ya libula, . . .

72 Oh, “libula.” Moto moko asengeli kotikela yo eloko moko, mpo ósangola yango. Ezali solo? Libula! Libula nini biso tozali na yango? Libula nini ngai nazalaki na yango? Nazalaki na moko te. Kasi Nzambe atikelaki ngai libula, ntango Atiaki nkombo na ngai na Buku na Bomoi ya Mwana-mpate, liboso na kozalisama ya mokili.

73 Oh, bokoloba: “Sikoyo, zela naino, ndeko, Yesu nde asalaki yango, ntango Akufelaki yo.” Te, Atikálá kosala yango te. Yesu ayaki nde kosómba libula yango mpo na ngai. Bótánga oyo elandi, mol-. . . nzela oyo elandi mpenza.

*Kati na ye, biso mpe tokómi kozua komonana. . .
tokómi basangoli ya libula, ndenge tobongisamaki
liboso kokokana na mokano na ye oyo azali kosala
makambo nyonso ndenge mokano malamau na ye elakisi:*

74 Nzambe, liboso na kozalisama ya mokili, ndenge tomonaki yango na kati ya malakisi oyo, elongo na bino, tomonaki ndenge Nzambe azalaki kobika-na-Ye-moko, ndenge kati na Ye, bolingo ezalaki. Kati na Ye, kozala Nzambe ezalaki; eloko moko ezalaki te mpo na kokumbamela Ye. Kati na Ye, kozala Tata ezalaki; ezalaki na . . . Azalaki Ye moko. Kati na Ye, kozala Mobikisi ezalaki; eloko moko ebungaki te. Kati na Ye, kozala Mobikisi ya babeli ezalaki. Yango ezali makoki na Ye. Eloko moko ezalaki kuna te. Boye, Bomoto na Ye Moko, toli malamau na Ye Moko nde esalaki makambo oyo, ete na nzela na Moto moko oyo, Klisto Yesu, Ákoka kosangisa makambo nyonso lisusu. Oh! “Liso emóná te, litoi eyóká te. . .” Kokamwa te ete likambo yango ezali libombami!

75 Bótala: “Asili kobongisa biso liboso mpo na libula oyo.” Soki nazali solo mosangoli na libula ya eloko moko, soki Nzambe azali kobeta na ekuke ya motema na ngai mpe azali koloba: “William Branham, Nabéngá yo eleki ntango molai, liboso na kozalisama ya mokili, mpo na koteya Nsango-malamau,” nazali na libula, libula ya Bomoi na Seko. Sikoyo, Nzambe atindaki Yesu mpo na kokomisa libula yango solo epai na ngai, ezalaki na eloko moko te oyo nakokaki kosala mpo na—mpo na kosangola yango. Ezalaki polele, ezalaki na motuya, ezali na eloko moko te oyo nakokaki kosala. Kasi ntango ngonga yango ekokaki, na ntango malamau oyo ya Ye Moko, Nzambe atindaki Yesu Mwana-mpate,

oyo abomamaki liboso na kozalisama ya mokili. Makila na Ye esopanaki mpo ete nákoka kozua libula na ngai. Mpo na kozala nini? Libula nini? Bobotami mwana, mpo na kozala mwana na Nzambe.

⁷⁶ Sikoyo, Oyo ekoki kokanga bino péma. Kasi boyebaki ete bato oyo bazali bana na Nzambe bazalaka banzambe ya mike? Bato boni basila koyeba yango? Bato boni bayebi ete Yesu alobaki bongo? Biblia, Yesu alobaki: “Mobeko na bino, yango moko, elobi te ete bozali ‘banzambe’? Mpe soki bobengaka bango banzambe. . .” Oyo kútu, Nzambe alobaki, na Genese 2, ete bazalaki banzambe, mpamba te bazalaki yango, bazalaki na makoki nyonso likoló na bokonzi ya mokili. Apésáká ye bokonzi likoló na biloko nyonso. Kasi abungisaki bonzambe na ye, abungisaki bomwana na ye, abungisaki mabelé na ye, mpe Satana azuaki bokonzi likoló na yango. Kasi, ndeko, tozali kozela komonana ya bana na Nzambe, oyo bakozonga mpo na kozua bokonzi lisusu. Kozela ete ngonga yango ékoka, ntango pyramide ekokóma na motó na yango, ntango bana na Nzambe bakomonana mpenza, ntango nguya na Nzambe ekokende (aleluya) mpe ekozua nguya nyonso oyo Satana abototaki ye yango. Iyo, misie, ezali ya ye.

⁷⁷ Azali Logos oyo ebimaki na Nzambe, ezali ya solo, wana ezalaki Mwana na Nzambe. Na nsima, Akómisaki moto nzambe ya moke wana. Mpe Alobaki: “Soki babengaka baoyo Liloba na Nzambe eyaki epai na bango, basakoli, soki babéngaka bango ‘banzambe’, baoyo Liloba na Nzambe eyaki epai na bango. . .” Mpe Nzambe Ye moko nde alobaki bongo, ete bazalaki banzambe. Alobaki na Mose: “Nakómisi yo nzambe, mpe Nakómisi Alona mosakoli na yo.” Amen. Fiuu! Ntango mosusu nazali kosala makambo lokola fanatíki moko ya religion, kasi nazali yango te. Oh, soki miso na bino ekoki kofungwama mpo na komona makambo yango. Malamu. Akómisaki moto nzambe, nzambe na mabelé na ye. Mpe mabelé na ye elongwe na mbu moko kino na mbu mosusu, elongwe na libongo moko kino na libongo mosusu; azali na bokengeli na yango.

⁷⁸ Ntango Yesu ayaki, lokola Nzambe Moko oyo-azangi lisumu, Atalisaki yango polele. Ntango mipepe ebetaki, Alobaki: “Kimia, zalá nye!” Amen. Mpe na nzete, Alobaki: “Moto moko te ália mbuma na yo.”

⁷⁹ “Solo, Nalobi na bino, bino baoyo bozali banzambe ya mike, ete soki olobi na ngomba oyo: ‘Longwa wana,’ mpe otii ntembe na motema na yo te, kasi ondimi ete likambo olobi ekokokisama, okoki kozua oyo osili koloba.”

⁸⁰ Bózonga na Genese, na oyo ya ebandeli, yango ezali nini? Sikoyo mokili mpe bokeli ezali kokimela, kolela, nyonso ezali koningana. Nini? Mpo na komonana ya bana na Nzambe, ntango bana ya solo, bana oyo babotami, bana oyo batondisami,

bakoloba mpe maloba na bango endimami. Nandimi ete tokómi sikoyo pembeni na likambo yango. Iyo misie. Loba na ngomba oyo, mpe ésalema bongo.

⁸¹ “Ndeko, na—nazali na mposa ya eloko *songolo-pakala*, ete likambo moko boye ésalema. Nazali mondimi ya Yesu Klisto.”

⁸² “Napesi yo yango na Nkombo na Nkolo Yesu Klisto.” Amen. Wana nde komonana moko.

⁸³ “Oh, ndeko, mbuma ya elanga na ngai ezali kozika na mói, kuna. Natikali kozua mbula ata moke te.”

⁸⁴ “Nakotindela yo mbula, na Nkombo na Nkolo.” Tala yango koya. Oh, kozela, kokimela, bikeli nyonso ezali kozela komonana ya bana na Nzambe. Nzambe apesaki motindo yango na ebandeli. Apesaki moto mabelé yango.

⁸⁵ Apesaki yango na Yesu Klisto, mpe Yesu apesaki yango na Nkombo na Ye, ná elikia oyo: “Bósenga na Tata nyonso oyo bolingi na Nkombo na Ngai, Nakosala yango.” Oh, Ndeko Palmer! Kozeláká komonana ya bana na Nzambe, esika yango, Lingomba!

⁸⁶ Ndenge nalobaki, Buku ya Baefese ezali Buku ya Yosua, mpe Yosua nde azali kotia bato na bisika na bango mpenza. Sikoyo, soki baboi kofanda kimia, mpe atii Efraime *awa*, na mabelé ya Manase, mpe *oyo* akozonga koswana mpe kosilika, ndenge nini bango bakotikáláká koyokana? na ntango oyo moko azoloba: “Nazali Batiste, nazali Metodiste, nazali Pantekotiste, nazali Unitaire, nazali Binitaire, nazali *Songolo-pakala*.”

⁸⁷ Bokosala yango ndenge nini? Bófanda kimia! Nzambe azali na mposa ya kotia na esika Lingomba na Ye, bana-mibali mpe bana-basi ya Nzambe. E Nzambe, tika ete názala na bomoi mpo námona yango, nde libondeli na ngai. Ekómi mpenza pene na lolenge ete nakoki kosimba yango na maboko na ngai, tóloba. Ekómi mpenza wana. Yango nde eloko oyo nazalaki na mposa makasi ya komona, kozeláká ntango oyo tokotambola na balabala, ebósono moko alali wana, uta libumu ya mama na ye: “Palata mpe wolo, nazali na yango te.” Oh, kozeláká komonana ya bana na Nzambe, aleluya, ntango Nzambe akomitalisa Ye moko, ntango bakosukisa bokono, bakosukisa cancer, bakosukisa maláli.

⁸⁸ Bokanisaka ete cancer ezali likambo mpenza? Biblia elobaki ete ntango moko ekoya, oyo bato bakopola mpenza na nzoto na bango, mpe bakokómbelé bakolia banzoto na bango liboso kutu bákufa. Cancer ezali mpasi ya líno, kokokana na oyo ezoya. Kasi, bómikanisela, epekisamaki na eloko ya nsómo wana, na mokolo wana, kosimba baoyo bazalaki na Elembo ya Nzambe. Yango nde eloko oyo tozali kosala makasi mpo na yango sikoyo, mpo tókota mpe tótiamana na esika na biso kati na Bokonzi ya Nzambe, liboso bolozu ya nsómo yango ébeta. Oh, malamumu mpenza! Eleko ya ntango, litondi ya ntango, libula.

*Kati na ye, biso mpe... tokómi basangoli... libula,
lokola tobongisamaki liboso...*

⁸⁹ Libula na biso epesamelaki biso ndenge nini, na nzela nini? Na nzela ya kobongisama liboso. Kobongisama liboso ezali makoki ya boyebi makambo liboso. Ndenge nini Nzambe ayebaki ete Akokaki kotiela yo motema mpo ózala motei? Na makoki na Ye ya koyeba makambo liboso. “Ezali te ye oyo alingi to ye oyo akopotaka mbangu, to ye... Ezali Nzambe, oyo akotalisaka mawa.” Ya solo, kobongisama liboso. Ayebaki nini oyo ezalaki kati na yo. Ayebaki nini oyo ezalaki kati na yo liboso kútu óya na mokili. Ayebaki nini oyo ezalaki kati na yo liboso ete mokili ézala mpo yo koya. Oyo wana nde—oyo wana nde Ye. Oyo wana nde Nzambe oyo azangi nsuka, oyo azangi nsuka. Bisó tozali na nsuka, tokoki bobele kokanisa na lolenge oyo esuká.

⁹⁰ Esili kokóma na motuya mingi mpo na ngai, banda likambo yango ekómelaki ngai. Nayebi te. Ntango nakanisaka wana, ntango natelemaki kuna, mpo na mwa ntango ya esengo wana, nazalaki komilobela: “Lobi ekoya, ezali te.” Lobi eleki ezalaki te, bokono ezali te, mawa ezali te. Ezali te likambo ya mwa esengo moke, na nsima esengo ya monene mingi; nyonso ezali esengo. Oh la la! Oh, ntango nazalaki kuna, nalobaki: “Oyo ezali nini?”

⁹¹ Mongongo yango elobaki: “Oyo ezali bolingo oyo ebongi be, mpe nyonso oyo osilá kolinga mpe nyonso oyo esilá kolinga yo, ezali awa, elongo ná yo sikoyo.”

⁹² “Mpe okotalisa biso epai ya Nkolo Yesu, ntango Akoya, lokola bilembo ya elónga ya lotómo na yo.” Namonaki basi kitoko wana oyo bazalaki kuna, bango nyonso bazalaki koyamba ngai mpe kogánga: “Ndeko na ngai molingami ya motuya!” Namonaki mibali, suki na bango ekitá na sima ya kígó na bango awa, bazalaki koya mbangu, koyamba ngai mpe koloba: “Ndeko na biso molingami!”

Mpe namilobelaki: “Likambo oyo elingi koloba nini?”

Alobaki: “Bazali libota na yo.”

⁹³ Nalobaki: “Libota na ngai? Ba-Branham bakokaki kozala mingi boye te, bazali ba-milió.”

⁹⁴ Alobaki: “Bazali baoyo babongolaki motema na nzela na yo!” Aleluya! “Bazali baoyo babongolaki motema na nzela na yo. Bazali baoyo...” Alobaki: “Omoni oyo ateleme kuna?” Mwasi ya kitoko mpenza koleka nyonso oyo namóná. Alobaki: “Alekaki mibu ntuku libwa ntango okambaki ye epai na Nzambe. Kokamwa te ndenge azali kogánga: ‘Ndeko na ngai molingami.’” Alobaki: “Akozala lisusu mobange te. Asili koleka yango. Azali kati na bongengi ya bolenge. Azali awa. Akoki komela mai ya malili te, azali na ntina na yango te. Akoki kolala mpongi te, mpo azolemba te. Lobi ekoya, ezali te, lobi eleki, ezali te, eloko moko mpe te. Tozali sikoyo kati na Seko-na-Seko. Kasi, mokolo

moko ya nkembo, Mwana na Nzambe akoya, mpe okosambisama kokokana na Liloba oyo oteyaki bango.” Oh, ndeko!

Nalobaki: “Polo akosengela komema etóna na ye?”

“Iyo, mesie.”

⁹⁵ Nalobaki: “Nateyaki Yango mpenza ndenge Polo ateyaki Yango. Natikálá kopengwa te, natikálá kokótisa bindimeli ya lingomba moko boye to eloko mosusu na kati te. Natikalaki ndenge moko.”

⁹⁶ Mpe bango nyonso bagángaki na boyokani moko: “Toyebi yango! Tozali kopema ná ndangá ya solo.” Balobaki: “Okotalisa biso epai na Ye, na nsima biso nyonso tokozonga na mokili, mpo na kobika seko-na-seko.” Oh la la!

⁹⁷ Kaka na ntango wana nde nabandaki kozonga. Natalaki, namonaki mobange ya nzoto na ngai ya kala awa, elali wana na mbeto, konunáká ná manyúnyúkú, ebebi mpe—mpe etondi na bokono ná mpasi, mpe namonaki maboko na ngai na nsima ya motó na ngai, mpe namilobelaki: “Oh, nasengeli nde kozonga kati na eloko wana lisusu?”

⁹⁸ Mpe nakobaki koyoka Mongongo wana: “Koba kopota mbangu! Koba kopota mbangu!”

⁹⁹ Nalobaki: “Nkolo, nandimaka ntango nyonso lobiko na nzoto kouta na Nzambe, nakokoba kondima yango. Kasi nakokoba kopota mbangu mpo na koluka milimo wana, boye, sunga ngai. Nazali na bato mingi kuna, nako . . . Tika ete názala na bomoi, Nkolo, mpe nakokótisa milió mobimba mosusu kuna, soki Okotika ngai kozala na bomoi.”

¹⁰⁰ Etali ngai te soki ezali bato ya lángi nini, ya endimeli nini, ya ekólo nini, oyo bango bazali, bango nyonso bakozala eloko moko ntango bakokóma kuna, mpe bandelo wana esili koleka. Oh, nakoki komona basi wana, kitoko mingi; namóná naino . . . ezalaki kokita, suki milai kino na nsé ya mokongo na bango. Ba-jupe ya milai kino na nsé. Bazalaki makolo ngulu. Komona mibali wana, ná suki na bango esopaná na nsima ya kíngo, suki ya mwa motane, ya moindo, ya lángi ndenge na ndenge. Mpe bazalaki koyamba ngai. Nazalaki koyoka ndenge bazalaki kosimba ngai. Nazalaki koyoka maboko na bango. Nzambe nde Mosambisi na ngai, mpe Buku ya búle oyo ezali polele. Nakokaki koyoka yango, ndenge nazoyoka maboko na ngai na elongi na ngai. Bazalaki koyamba ngai, ná basi, liyóki moko te ezalaki, ndenge ekokaki kozala sikoyo. Etali ngai te ózala mosanto ndenge nini, ózala nani, ózala motei ya ndenge nini, ózala sánzó to oyo nyonso okoki kozala, ezali na mobali moko te oyo akoki kotika mwasi áyamba ye, kozanga ete áyoka mayóki ya bomoto. Ezali mpenza solo. Kasi, ndeko, soki olongwe awa mpe okómi na ngámbo wana, ezali lolenge wana te kuna. Oh la la! Ezali mpenza . . . Oh, ezali . . . Ekoki kosalema te. Nyonso ezali kaka bolingo. Mobali nyonso azali mpenza ndeko mobali mpe mwasi

nyonso azali mpenza ndeko mwasi. Liwa ezali te, mawa ezali te, zúwa ezali te, eloko moko te, eloko moko te ekoki kokóta kuna. Ezali bobele bobongi be. Yango nde oyo ngai nazolinga mpenza kozala. Yango nde esika nazoluka koluka kotiamama.

¹⁰¹ Nalobaki: “E Nkolo, yango nde ntina oyo nazali awa na ndakonzambe, komeka kotia lingomba na molongo.” Koyebisa bino, ndeko mobali mpe ndeko mwasi, ete ezali bobele na eloko moko oyo ekoki kokóta yango, ezali bolingo oyo ebongi be. Ezali te mpo ozalaka sembo na Branham Tabernacle, to na lingomba Metodiste to na lingomba Batiste. Makambo yango ezali mabe te, bosengeli kozala yango. Kasi, oh, baninga, bosengeli. . . Ezali te mpo olobá minoko ya sika, obiná na Molimo, mpo obengáná milimo mabe to olongólá bangomba ná kondima. Nyonso wana ezali malamumu, mpo ezali na yango mabe te, kasi ata bongo, bobele soki bolingo ebongi be ya solo wana ezali kuna na kati. Kuna nde esika bolingo ebongi be ezalaki. Mpe yango nde eloko bobele moko oyo ekokótisa yo kuna. Yango nde eloko bobele moko oyo ekoki kouwela kuna, yango nde eloko bobele moko oyo ezalaki kuna. Oh la la! Ezali kotiamama lokumu ya mwana. Nzambe, liboso na kozalisama ya mokili!

¹⁰² Sikoyo, tósala noki-noki, tósilisa mokapo moko oyo, ata bongo, soki tokokoka, na miníti zomi oyo ekolanda.

Kati na ye, biso mpe tokómi basangoli ya libula. . . (Tosangoli nini? Bomo ya Seko.) . . . ndenge tobongisamaki liboso. . .

Ndenge nini? Moto nyonso azali kososola yango? Yo obengaki Nzambe? Te, Nzambe nde abengaki yo. Bato mosusu balobaka: “Oh, nalukaki Nzambe mpenza, nalukaki Nzambe.”

Osalaki yango te. Moto moko te atikalá koluka Nzambe. Nzambe nde alukaka moto. Yesu alobaki: “Moto moko te akoki koya epai na Ngai soki Tata na Ngai abendi ye liboso te.” Bomoni, ezali lolenge ya moto, kokima Nzambe. Mpe okoloba sikoyo. . .

¹⁰³ Wana, wana nde eloko oyo etungisaka ngai, mpo na koteya bino; bótíkala te na lolenge moko oyo bozalaki kotambola liboso, bóbóngwana sikoyo! Bóyoka ngai wana nazali koloba yango, YANGO ELOBI NKOLO. Natikalá komibenga bongo te, nazali yango te. Kasi bobengaka ngai mosakoli na bino, to mosakoli. Mokili endimaka yango, mokili mobimba, bato milió na milió na milió. Natéyá mbala moko longwa na monoko na ngai mpe na banzela mosusu, na bato milió zomi to—zomi to zomi na mibale, to koleka, koloba mbala moko. Namóná bimononeli nkóto ntuku na ntuku, bilembo mpe bikamwa, mpe ata moko te na yango etikálá kozánga kokokisama. Mpe ezali ya solo. Ayébisá ngai makambo liboso, oyo ezángá kokokisama ata mokolo moko te, na ndenge wana mpenza. Nakoki kosamba na moto nyonso mpo na yango. Ya solo. Nabetaka tólo te ete nazali mosakoli, kasi bino bóyoka ngai.

104 YANGO ELOBI NKOLO, ekosengela kozala na bolingo ebongi be mpo na kokótisa yo na esika yango, mpamba te bobele yango nde ezalaki kuna. Etali likambo ya mbongo te, boni boni olakisaka ete osambelaka, misala malamumu boni osálá, to eloko nini osálá, ekozala na ntina moko te na mokolo wana. Ekosengela kozala na bolingo ebongi be. Boye, nyonso oyo osalaka, tia makambo mosusu nyonso pembeni, kino ótondisama mpenza na bolingo na Nzambe, kino ete ókoka kolinga baoyo bayinaka yo.

105 Nazali kaka, ndenge nalobaki na ntongo ya lelo, nasálémá, mobimba na ngai ezali ngolu. Bato mingi balobaka: “Sikoyo, yo kwanzá ngai na mokongo, bongo ngai nakokwanza oyo ya yo. Iyo, soki osaleli ngai likambo moko, ngai mpe nakosalela yo likambo moko.” Oyo wana ezali ngolu te. Ngolu ezali boye, soki oyoki mokusa na mokongo, nakokwanza yango ata bongo, ókwanza oyo ya ngai to te; okoki kobeta ngai mbata na elongi, mpe koloba “mokongo na ngai esali mokus-. . . , to, ezali na mposa ya kokwanzama,” nakokwanza yango. Bomoni? Ezali bongo, sala eloko moko. Nandimaka na misala te. Nandimaka ete misala ezali bolingo. Misala ezali—misala ezali etaliseli ete ngolu esili kozua esika. Nabikaka na bosembo epai na mwasi na ngai te mpo nakanisaka ete akokabwana na ngai soki nasali bongo te, nabikaka na bosembo epai na ye mpo nalingaka ye.

106 Nateyaka Nsango-malamu te mpo nakanisaka ete nakoki kokende na lifelo soki nasali yango te, nateyaka Nsango-malamu mpo nalingaka Ye. Ya solo mpenza. Bokanisi ete nakokatisa bambu ya ba-mbóngé makasi wana, ná ba-mpépo oyo ékokitáká lokola elingi kozinda na mbu mpe emati, wana mikalí-kalí ezali kopela-pela zinga-zinga, mpe—mpe nyonso mosusu wana, mpe na miniti moko to mosusu. . . mpe bato nyonso bazogángáká, mpe “ba-Maria Losáko” ezotangama na mpépo mobimba, mpe nyonso wana? Bato bazotepa-tepa na mikába ya sécurité na bango, mpe mokúmbi mpépo azoloba: “Essence etikali ekoumela kaka miniti zomi na mitano, nayebi esika tozali te.” Bokanisi ete nakosala yango kaka—kaka mpo na esengo ya kosala yango? Hah! Bokanisi ete nakolinga kozonga kuna na zamba monene, esika basodá ya Allemagne basengelaki kozinga ngai na maboko na bango, *boye*, mpokwa nyonso, mpo na kokótisa mpe kobimisa ngai na liyangani, kino ntango Molimo Mosanto ábanda kosala bikamwa? Ba-communiste bazalaki kolandela ngai na ba-jumelle ya butu, mpo na kobeta ngai masasi na ntáká ya kilomètre moko na ndambo. Bokanisi ete nakosala yango kaka mpo na esengo? Ezali mpo eloko moko kati na ngai elingi; bazali bato oyo Klisto akufelaki. Polo alobaki: “Namilengeli kaka mpo na kokende na Yelusaleme te, kasi nazali kokende kuna mpo na kobákama na ekulusu. Nazokende kuna mpo na kokufa. Nazokende kuna mpo na kokufa na ntina na Nkolo.” Ezali eloko moko, bolingo oyo etindikaka yo, oyo esalisaka yo yango. Ezali mpenza bongo.

107 Soki náteyaka Nsango-malamu mpo na mbongo, soki ezalaki bongo, nalingaki kozala na nyongo ya ba-dollar nkóto ntuku mibale te, na mpokwa ya lelo, nalingaki kozala na nyongo wana te. Te, misie. Mpo nalingaki kobomba ndambo ya—ndambo ya bamilió oyo bakabelaki ngai. Moto moko, moto moko, atindaki basali ya FBI ná mokanda ya kofuta ba-dollar milió moko na nkóto nkama mitano. Mpe nalobaki: “Bózonga na yango.” Ezali mpo na mbongo te! Ezali likambo ya mbongo te. Nateyaka Nsango-malamu mpo na mbongo te. Mpo na yango te!

108 Ezali mpo na bolingo. Eloko nalingi kosala, ezali ete, ntango nakokátisa na ngámbo mosusu ya mpéma ya nsuka, oyo ekoki kosalema na miníti mitano kobanda sikoyo, ekoki kosalema na ngonga mibale kobanda sikoyo, ekoki kosalema na mibu ntuku mitano kobanda sikoyo, nayebi te ntango nini ekosalema. Kasi ntango ekosalema, ete nakómi mpenza kuna, nalingi komona bino na bongengi ya bolenge, koya mbangu, kogángáká: “Ndeko na ngai molingami! Ndeko na ngai!” Yango nde likambo oyo ezali na motema na ngai. Wana nde ntina yango. Nazoluka kozanga koyokana na bino te mpo na kozala—kozala ndenge mosusu, kasi nazoluka kotia bino na nzela oyo ezali malamau. Yango nde nzela mpo na kokóta. Lingomba na yo te, denomination na yo te, kasi mbótámá na yo kati na Klisto. Oh la la! Fiuu!

Kati na ye... tokómi basangoli... libula, ndenge tobongisamaki liboso kokokana na mokano na ye oyo azali kosala makambo nyonso ndenge mokano na ye elakisi:

109 Bóyoka. Tokosilisa nsima na miníti moke. Bóyoka na bokebi sikoyo, liboso ete tósilisa.

Mpo tózala na ntina ya masanzoli ya nkembo na ye, biso baoyo totiaki liboso elikia epai na... Klisto.

Bino mpe botiaki elikia epai na ye,...

110 Bótala likambo oyo malamau sikoyo, na bokebi nyonso. Bólata ba-kazáka na bino, ba-kazáka ya Nsango-malamau. Bófungola matoi na bino malamau, bóyoka na bokebi. Nakómi na molonga ya 13.

Bino mpe botiaki elikia epai na ye, nsima na koyoka...

“Kondima eutaka na...” [Losambo balobi: “Koyoka.”—Mok.] “koyoka...” [“Liloba.”] “Liloba na...” [“Nzambe.”]

... nsima na bino koyoka liloba ya solo,...

111 Solo ezali nini? Liloba na Nzambe. Ezali boye te? Yoane 17:17, bino baoyo bozali kokoma Makomi, Yesu alobaki: “Búlísá bango, Tata, kati na Solo. Liloba na Yo ezali Solo.”

. . . nsima . . . bino koyoka . . . solo, nsango-malamu ya lobiko na bino: . . .

¹¹² Lobiko nini oyo azalaki komeka koyebisa bango? Ete babongisamaki liboso na kozalisama ya mokili (Ezali bongo?), mpo na kotiamama lokumu ya bana, babongisamaki liboso mpo na Bomoi na Seko. Sikoyo, nsima na bino kokóta na Bomoi na Seko, nsima na bino kobikisama, kobulisama, kotondisama na Molimo Mosanto, bokómi bana. Sikoyo Nzambe azali na mposa ya kotia bino na bisika na bino, oh, mpo bókoka kosala mpo na Bokonzi na Ye mpe nkembo na Ye.

¹¹³ Yango nde Nsango-malamu. Ezali ete, liboso, koyoka Liloba: “Bóbóngola mitema, mpe bóbátisama na Nkombo na Yesu Klisto mpo na bolimbisi ya masumu.” Kolongola masumu na bino nyonso, kobélela Nkombo na Nkolo Yesu Klisto, mpo na kokóta na Mboka ya elaka. Elaka yango ezali mpo na moi-mobembo nyonso oyo azali na nzela na yo. Soki obimaki na ndako na yo, na mpokwa oyo, lokola mosumuki, kolobáká: “Nakokende na Branham Tabernacle,” Nzambe apesi yo libaku malamau na mpokwa oyo. Ezali na eloko moko ekaboli yo ná Mboka ya elaka. Mboka ya elaka ezali nini? Molimo Mosanto. Eloko oyo ekabolaki Yosua ná mboka ya elaka ezalaki Yaladene. Ya solo mpenza.

¹¹⁴ Mose, lokola etaliseli ya Klisto, akambaki bana kino na mboka ya elaka, na nsima Mose akotisaki bana yango na mboka ya elaka te. Yosua moto akotisaki libota yango mpe akabolaki mboka. Yesu afutaki ntalo, akambaki bango kino na Molimo Mosanto. Nzambe akitisaki Molimo Mosanto mpe Atiaki lingomba na esika na yango, na molongo, moto moko na moko, atondisaki ye na Bozali ya Ezali na Ye. Bomoni oyo nalingi koloba? Nyonso kati na Klisto Yesu, Nzambe nde abongisaki oyo liboso, na kobéngama ya Nsango-malamu oyo!

¹¹⁵ Polo, na Bagalatia 1:8, alobaki: “Soki Mwanje moko ayei koteya eloko nyonso mosusu, tika ete álakelama mabe.” Bosolo, Nsango-malamu. Sikoyo, báyoka na bokebi, wana tozali kokoba kotángá, mpo na kosilisa molongo yango.

. . . nsango-malamu ya lobiko na bino, kati na ye . . .
(Báyoka na bokebi.) . . . nsima na bino kondíma, bosilaki kotiamama elembo ná Molimo Mosanto ya elaka,

¹¹⁶ Na mikolo ya nsuka, Biblia elobi, sikoyo bótala malamau, na mikolo ya nsuka, ekozala na ndenge mibale ya bato. Moko na bango akozua Elembo ya Nzambe, mosusu akozua elembo ya nyama. Boye te? Bato boni bayebi yango? Ee, soki Elembo ya Nzambe ezali Elembo ya . . . Soki Elembo ya Nzambe ezali Molimo Mosanto, na bongo, kozanga Molimo Mosanto, ezali elembo ya nyama. Mpe Biblia elobi ete milimo mibale yango ekozala mpenza pene elongo, ekopengwisa ata Baponami mpenza, soki ekokaki kosalema. Ekosala yango ata moke te, mpo baponámá mpo na Bomoi na Seko. Bomoni?

117 Lingomba, ndenge toyebi yango, ezali na báseka zomi oyo babimaki mpo na kokutana na Nkolo, bango nyonso babúlisamaki, bango nyonso basantu, moko na moko na bango babulisamaki. Mitano bazalaki koumela mpe batikaki ete miinda na bango ékúfa. Mitano bazalaki na mafuta na miinda na bango. “Mpe, tala Mobali na libala ayei!” Mpe mitano oyo bazalaki na mafuta na miinda na bango bakotaki na Elámbo ya Libala. Kasi bamosusu batikalaki libanda, epai wapi kolela, konguluma mpe kolia míno ezalaki. Bómilengela, mpo boyebi te miniti nini oyo Nkolo akoya. Bózala na . . . Mafuta etalisaka nini na Biblia? Molimo Mosanto.

118 Sikoyo, mpo na bino lelo, bino bandeko ba-Adventiste du Septième jour, oyo bolobaki ete mokolo ya nsambo ezali Elembo ya Nzambe, bótalisa Likomi moko mpo na kondimisa yango. Biblia elobi ete Elembo ya Nzambe ezali Molimo Mosanto. Bótala oyo malamumu. “Oyo . . .” Bótala malamumu molongo ya 13, sikoyo.

. . . nsima na bino kondima, bosilaki kotiyama elembo na—na Molimo Mosanto ya elaka.

119 Bóbalola na Baefese 4:30, nabanzi ezali yango. Tótala soki tokozua 4:30 te, tótala soki oyo ezali ndenge moko te. Baefese, mokapo ya 4, molongo ya 30. Iyo, yango oyo, 4:30.

Bóyokisa Molimo Mosanto ya Nzambe mawa te, oyo na nzela na yango botiyami elembo kino mokolo na lisiko.

120 Ntango boni? Ntango moto azui mpenza, mpenza Molimo Mosanto, Yango ekoumela na yo ntango boni? Kino na kolamuka oyo ekolanda, kino mokolo nkóko ya mwasi akotelemela yo, kino mokolo patron akogángela yo? Kino mokolo na lisiko na yo! Aleluya!

121 Nsima na yo kokufa, nsima na yo kokóta na Mboka wana, ntango ozali kuna elongo ná balingami na yo, ozali kaka ya kotondisama na Molimo Mosanto. Likomi! Ozali kaka ndenge ozali sikoyo, longola bobele ete ozui. . . osili kokóta na nzoto mosusu. Obongoli kaka bandako. Oyo ekómi mobange, okokaki lisusu kobeta nsété na mabaya likoló na yango te, ba-chevron esilaki kopola. Ya solo. Na bongo, osundoli bobele mobange ya eloko yango, otiki yango ékoba kopola awa na nsé, mpe okoti na oyo ya sika. Boye te? “Mpo soki mongombo ya mabele oyo ebebisami, tozali na moko oyo ezali kozela.”

122 Bozomikanisela, mokolo mosusu wana, ntango tolobelaki yango? Ntango bebé azali kosálema kati na libumu ya mama, mpe mwa misisa na ye ezali kosukuma, koningana, mpe nyonso wana. Kasi kaka ntango mama abimisi bebé yango, mpe bebé yango ayei na mokili, eloko ya liboso, nzoto moko ya molimo ezalaka wana mpo na koyamba mwa nzoto ya mokili oyo wana. Ntango mosusu monganga akopesa ye. . . [Ndeko Branham abeti maboko mbala moko—Mok.] ndenge wana, to eloko moko oyo

ekoningisa ye, mpe “waa, waa, waa!” Na mbala moko, akei na libéle ya mama, “um, um, um,” wana azali koningisa mwa motó na ye na libéle ya mama na ye, mpo banzela ya miliki ébanda kobimisa miliki.

¹²³ Mwa mwana ya ngombe, kaka ntango ebimi na libumu ya mama, ekotelema na mwa mabólóngó na yango nsima na miníti moke. Ekosala nini? Ekozonga kuna noki, ekokangama na mama yango, mpe ekobanda koningisa mwa motó na yango, komatakokita, ndenge wana, mpo émela miliki. Aleluya! Iyo misie.

¹²⁴ Ntango nzoto ya mokili oyo ekótaka kati na ye, ezalaka na nzoto moko ya molimo oyo ezalaka yango.

¹²⁵ Mpe ntango nzoto ya mokili oyo ekweyi na mabelé, aleluya, ezali na nzoto moko ya molimo oyo ezozela kuna! Tolongwaka nde na moko mpo na kokóta na mosusu, tobongolaka nde bisika ya kofanda. Nzoto ya kufa oyo esengeli koláta kozángá kokufa, oyo ya molimo; oyo ya kopola ekoláta oyo ya kozángá kopola. Nzoto ya manyúnyúku oyo, ya kotengama, ya kogumbama, kasi lolenge ya komonana na yango ekobongwana ata moke te, nalingi koloba, ntango ekokóma na ngambo kuna, okozala kaka na molimo yango moko.

¹²⁶ Bótika nápesa bino mwa likambo moko, oyo ekoyokana lokola mwa mobulu mpo na bino, kasi ezali Biblia, na nsima nakopesa bino oyo ekolongola bino mobulu yango. Bóyoka oyo malamú. Ntango mobange Saulo, mo—mokonzi, mo—mobange, mobange motei monene ya ebongiseli oyo azalaki kuna na ntango wana, boyebi, oyo alekaki bango nyonso na molai, mpe bazalaki kobanga, bayebaki eloko moko te na ntina na Oyo-euti-likoló. Esengelaki na Dawidi koya mpe kokangola mwana-mpate na monoko ya nkosi, koboma Goliath. Bótala ye malamú. Saulo azongaki nsima mingi mpenza, mosika na Nzambe, akómaki koyina motei ya kotúntuka oyo. Mpe na esika ázala na ngámbo na ye, mpo na komeka kosunga ye, akómaki kotelemela ye. Ezali mpenza elílingi ya makambo ezali kosalema, elílingi yango mpenza! Apesaki ye mokongo!

¹²⁷ Bato boni bazalaki awa ntango nakendeki na mobembo na ngai ya liboso, mpe nateyaki: “Dawidi abomi Goliath,” ntango nakendeki? Bato mingi, bamosusu, ndambo na bato ya kala. Nazomilengela mpo na kokende lisusu. Bozoyeba lisusu likambo nini, bomoni likambo euti kosalema, mokolo ya Lomingo eleki? Ezali kokóta na etápe mosusu. Liyangani ya mibale ya Dawidi, etápe ya mibale ya lotómo na ye. Ya solo mpenza. Elingi koloba, na bongo akómaki mokonzi ya Yisraele. Bótala, lotómo ezali sikoyo kokóta na etápe ya likoló koleka, kokóma monene koleka. Pelamoko ná Dawidi. Namonaki likambo oyo ntango ayaki, ye Dawidi, oh, ntango Nzambe atindaki Dawidi kuna, mpe abomaki nkosi, bótala, mpe abomaki ngombolo, na nsima, abomaki Mofilistia. Sikoyo, ntango moko eyaki, oyo Nzambe

atindaki molimo mabe likolo na mobali wana. Mpe ya . . . Mpo na nini? Mpo áyina Dawidi. Mpe nandimi . . .

¹²⁸ Sikoyo, ba-bande oyo. Sikoyo, bóyoka, bandeko, bino baoyo boyokaka ba-bande oyo, soki bokondimela ngai te, bólimbisa ngai. Bomoni, nalingaka bino. Nakokutana na bino kuna na ngambo ata bongo, bomoni, mpo soki ozali moto na Nzambe, nakokutana na yo ata bongo. Kasi, nalingi koloba boye, ntina na yango, yango oyo: Kaka mpo Saulo amonaki ete Dawidi azalaki na eloko oyo ye azalaki na yango te. Na bongo, eloko nini esalemaki?

¹²⁹ Mwa moto moko ya “motane,” ya nzoto mike apusanaki, Biblia elobi ete azalaki “motane.” Azalaki mpenza mwana ya kitoko mingi te, “motane,” elingi koloba azalaki lolenge ya mwa moto moko ya nzoto mike. Mpe akendeki kuna, mpe Saulo, ee, alataki bilamba ya etumba ya Saulo, mpe nabanzi ete nguba ya nzoto ekitaki kino na makolo. Mpe alobaki: “Bólongola ngai yango. Ngai—nasili . . .” Ntango mosusu apesaki ye diplôme ya doctorat, Doctorat ya Philosophie to Doctorat ya Droit, to eloko moko, boyebi. Bongo alobaki: “Nayebi eloko moko te na ntina na likambo wana, mpo nameká yango te. Bótika ngai názua eloko oyo, nayebi eloko nini nakosala ná yango.” Iyo, misie. Azuaki bilingóngo.

¹³⁰ Mpe bana-basi, mangomba, bapesaki Dawidi nkanda, mpo mangomba bazalaki koyemba: “Saulo, ntango mosusu abomi bankóto na ye, kasi Dawidi abomi bankóto zomi na ye.”

¹³¹ Na bongo ye akómaki na zuwa: “Ezali likambo ya Nkombo na Yesu wana, ezali na Yango na eloko moko te.” Ya solo. Mpe eloko nini Nzambe asalaki ye? Nzambe atindaki molimo mabe likoló na ye, mpo áyina Dawidi, mpe ayinaki Dawidi kozanga ntina.

¹³² David akokaki kokámola ye kingo mwa mbala ebele. Akokaki kosala yango, kasi atikaki kaka. Alobaki ata likambo moko te. Na ntembe te, akokaki kosala yango. Akendeki kuna mpe akataki sóngé ya kazáka na ye, na butu moko, azongaki, alobaki: “Tálá awa, omoni!” Iyo, misie, akokaki kosala yango, kasi atikaki ye kimia. Akokaki kokabola losambo na ye, kopanza bango, mpe kobanda ebongiseli ya ye moko, soki alingaki. Kasi asalaki yango te, atikaki Saulo ákoba. Bótika Nzambe ábunda etumba yango. Iyo misie.

¹³³ Boye, wana akobaki na ye, liyangani ekómaki kokende na kosuka, akobaki kotambola, molimo mabe wana ekomaki kosala ete Saulo azalaki kokoka kozua eyano uta na Nzambe te. Nsima na mwa ntango, a . . . Molimo ya Nkolo esilaki kotika ye. Mpe mobange Samuele, moto oyo bango babóyáká, moto oyo azaláká mpenza Mongongo na Nzambe mpo na bango, moto oyo alobaki na bango kútu liboso bákóma na mposa ya kobika lokola mokili . . .

134 Ndenge nini lingomba ékóma na mposa ya kobika lokola mokili? Mpo na nini ba-Pantekotiste, oyo babatisámá, ba-Metodiste oyo babikelá Molimo Mosanto, mpe ba-Batiste ná ba-Presbiterien bákóma na mposa ya kobika lokola mokili? Mpo na nini basalaka bongo? Nayebi te. Na—nakoki mpenza kososola yango te. Okoloba: “Ee, ezalaka mpenza esengo kobeta lisano ya carte, kaka mpo na kosakana mwa moke, kaka mwa lisano ya mbongo,” ndenge nyonso oyo bobengaka yango. Ezali lisumu. Osengelaki kozala na biloko wana te, na ndako na yo. “Ee, ezali mabe te komela mwa verre moko ya bière. Tomeli kaka mwa moke. Ngai ná mwasi na ngai, tomelaka mwa moke na nsima ya nzanga.” Mpe, kala mingi te bokoma, bana na bino bakómi komela mwa moke. Na ntembe te.

135 Bongo bino basi, hum, zabolo asili kosala. . . Yango nde likambo oyo asalaki na ebandeli, mpe, na ntembe te, asili mpenza kokánela bino bandeko basi. Asalaka bongo kaka mpo. . . mpo ayebi eloko nini akoki kosala. Akoki kopengwisa mwasi na ntango moke mpenza, mbala nkóto, koleka mobali. Nayebi ete ezosala bino mpasi, kasi ezali Solo. Ya solo mpenza. Yango nde asalaki na elanga ya Edene. Akoki kosala. . . Sikoyo, mwasi azalaki sémbó, azalaki na bosémbó, kasi apengwisamaki. “Adama apengwisamaki te,” ndenge Bible elobi. Mobali apengwisamaki te, kasi mwasi apengwisamaki. Boye, akoki kopengwisa mwasi. Mpe ata bongo, ba-pasteur bakokoba kobúlisa basi lokola batei, kotia bango lokola bakambi ya balosambo, ndenge wana, kasi Biblia oyo ekweisaka yango longwa Genese kino na Emoniseli. Bokoloba: “Ee, ezali mabe te. Ezali mabe te. Bazali na. . . Bakoki na bango koteya lokola bamosusu.” Nayebi ete ezali ya solo.

136 Lokola mokolo moko, moto moko abandaki koloba minoko na sika, ngai nakobaki kaka koteya, mpe ntango nabimaki. . .

Mwasi moko alobaki na mwana na ngai ya mobali, alobaki: “Nazali na nsango moko ya kopesa lobi na mpokwa,” alobaki, “ntango papa na yo akokóma na etumbelo.”

Alobaki: “Ee, Madame, olingi koloba nini?”

137 Na mpokwa yango ntango ekomaki, ntango nazalaki komilengela mpo na kobenga bato na etumbelo, abongisaki suki na ye, amatisaki ba-soséti na ye mpe nyonso wana, amilengelaki, apumbwaki mbala moko na katikati ya nzela mpe abandaki kopumbwa-pumbwa, koloba minoko na sika mpe kosakola. Nakobaki kaka koteya, kobenga bato na etumbelo. Namemiaki yango ata moke te, ezalaki malamau te. Na bongo, ee, Biblia epekisi yango, elobi: “Mo—Molimo ya basakoli etósaka mosakoli.” Nzambe azali na. . . Nzambe azali koloba na etumbelo, bótika ete Ye áloba. Polo alobaki: “Soki likambo moko emónisami epai na moto moko, tika ete áfanda kimia kino ntango moko oyo alandi ásilisa.” Ya solo.

138 Sikoyo, na bongo, ntango nabimaki, bato yango balobaki, bato mingi bazalaki koloba: “Oyokisi Molimo Mosanto mawa na mpokwa oyo.”

Nalobaki: “Likambo nini esalemi? Nasali nini?”

139 Balobaki: “Ee, ntango ndeko mwasi wana apesaki nsango wana, aleluya,” alobaki, “wana.”

“Ee,” nalobaki, “ngai nazalaki koteya. Ye azalaki libanda na alimá.”

140 “Oh,” balobaki, “oyo wana ezalaki ya sika, mbala moko kouta na Ngwende. Ezalaki ya sika, koleka oyo ozalaki koteya.” Hum!

141 Sikoyo, yango ezali kotalisa e . . . to ezali kotalisa likambo oyo, mpe nazali koyebisa bino yango na limemia, to ezali boléma, to kozanga limemia, to malakisi ya moto atángá te, oyo ayebi Nzambe malamú te, lokola lapin oyo eyebi sapato ya neige te. Sikoyo, yango, nalobi yango te mpo na ko—kosekisa, mpamba te oyo ezali esika ya kosala maseki te. Kasi ezali—ezali mpenza solo. Moto oyo asengelaki koyeba ete Nzambe azali mobandisi ya mobulu te. Azali oyo ya kimia. Biblia, bayebi yango te. Nyonso oyo bayebi kosala, ezali kopumbwa-pumbwa, koloba minoko na sika, koloba: “Nazui Molimo Mosanto. Aleluya!”

142 Nazalaki na Afrika, mpe namóná banganga-nkisi ná bamosusu koloba, pene na nkóto mitano na mbala moko; kopumbwa-pumbwa, ná makila na bilongi na bango mobimba, bazalaki koloba minoko na sika, mpe komela makila na mokuwa ya motó ya moto; kobélela zabolo, mpe koloba minoko na sika.

143 Nzokande, koloba minoko na sika ezali likabo ya Nzambe, kasi ezali te ndangá oyo ekweyaka te, ya Molimo Mosanto. Tika ete náyebisa bino yango sikoyo. Nandimaka mpenza ete basantu nyonso, oyo bazui mpémélá, balobaka minoko na sika. Nandimaka ete moto, na ntango moko boye, soki azui mpenza mpémélá ya Nzambe, akoloba minoko na sika. Nandimaka yango. Kasi nandimaka te ete yango ezali ndangá ete ozali na Molimo Mosanto. Iyo, misie. Nandimaka ete na bantango moko, ntango ozali na kondima, moto, okoki kokende kotia maboko likoló ya mwana oyo azali na cancer, na ntango oyo batei ntuku mitano basilaki kobondela mpo na ye, mpe akobikisama mpo mama na ye azali na kondima mpo na mwana yango. Nzambe nde apesaki ye mwana yango, azali enama ya Nzoto na Klisto. Iyo, misie. Nandimaka yango. Namóná yango kosalema mpe nayebi ete ezali solo. Kasi likambo oyo ezali, ezali nde kotia lingomba na molongo, kotia na molongo mpo tókoka kosala mosala.

144 Sikoyo tika tósilisa eteni oyo etikali ya molongo oyo awa, liboso ete tókende.

. . . nsima na bino koyamba, bino bosilaki kotiama
elembo ná Molimo Mosanto ya elaka.

145 “Elembo!” Elembo ezali nini? Elembo ezali nini? Elembo ezali, eloko ya liboso oyo yango elakisaka, ezali ete mosala oyo esili kosila, mosala oyo esili. Eloko elandi oyo yango elakisaka, ezali bonkóló-eloko. Mpe eloko elandi oyo yango elakisaka, ezali bokengi, kobatelama.

146 Ndakisa, nazaláká kosala na kompaní ya Nzela ya engunduka ya Pennsylvanie, nazaláká kosala elongo ná tata na ngai, na nzela ya engunduka yango. Tozalaki kokótisa biloko na ba-wagon. Mpe tozalaki kokótisa, kuna na kompaní ya kokanga biloko mopiko, tozalaki kokótisa manzanza ya biloko ya kolia, mpe tozalaki kotia ndambo na likoló *awa*, mpe ndambo na nsé *kuna*, mpe ndambo na likoló *boye*. Kasi liboso ete wagon yango étiana elembo, inspecteur azalaki koleka wana, mpe kotindika yango, kobeta *oyo*, koningisa oyo *wana*. “Ah! longola yango! Ekopanzana liboso ékóma kuna. Longola yango! Bóbimisa yango libanda. Bóbandela.” Inspecteur azalaki kolongola wagon yango.

147 Molimo Mosanto nde Inspecteur. Aningisi yo mwa moke, mpe ozwi kizunguzúngu. “Ondimaka Liloba nyonso ya Nzambe?”

“Nandimaka makambo ya kala wana te, ya Nkombo na Yesu.”

“Longola yango. Ozui kizunguzúngu.”

“Nandimaka lobiko na nzoto uta na Nzambe te, to makambo ya ndenge wana.”

“Ozokoba kozwa kizunguzungu. Bimisa yango libanda.”

“Ondimaka ete Yesu Klisto azali ndenge moko lobi. . . ?”

“Ee, na lolenge moko boye.”

“Ozui kizunguzungu. Bwaka yango libanda, bomoni, engelami naino te.” Iyo misie.

148 Ndeko, ntango olengelami mpo na koloba: “Amen!”

“Osílá kozua Molimo Mosanto?”

“Amen!”

“Makambo nyonso esili?”

“Amen.” Na bongo Inspecteur akosala nini? Biloko nyonso etiami malamú mpe eléndi, etondi na Nsango-malamú. Oh, Liloba nyonso ya Nzambe ezali malamú. Nyonso ebongi be. “Nandimaka Liloba nyonso. Amen! Amen! Amen!”

“Ondimaka ete Nzambe abikisaka kaka bokono?”

“Amen.”

“Ondimaka ete Yesu azali motindo moko lobi, lelo mpe libela?”

“Amen.”

“Ondimaka ete Molimo Mosanto ezali mpenza solo, kaka ndenge Etikálá kozala?”

“Amen.”

“Ondimaka ete Molimo moko oyo ekitaki likoló na Polo, nde ekiti likoló na biso?”

“Amen.”

“Ondimaka ete Esalaka ndenge moko likoló na biso, ndenge Esalaki likoló na bango?”

“Amen.” Oh, oh, ebandi kolénda sikoyo. Ah-ha, ebandi kolénda sikoyo, tolingi kokanga ekuke. Malamu.

¹⁴⁹ Na bongo inspecteur akangi ekuke. Asali nini? Atii elembo likoló na yango. Na nsima ayei mpe akamati mwa ba-pince ya eloko yango, asemboli maboko na mwa eloko yango mpe akangi yango na elembo. Ekozala malamau ete óbuka yango te. Soki biloko yango, wagon wana, esukeli na yango ezali Boston, bakoki kobuka yango te. Ekozala kosala mbeba ya kokóta boloko, soki obuki elembo wana liboso ete ékómana na Boston. Mpe moto oyo azali na bokonzi wana nde akoki kofungola elembo yango, bobele ye. Ya solo. Ezali eloko ya kompani ya nzela ya engunduka *songolo-pakala*. Ezali elembo na bango. Ezali ndangá na bango, ete wagon oyo esili kotondisama na biloko, ete wagon oyo ebelemi. Ezali eloko ya bango. Bakoki kotia elembo ya “B&O” na oyo ya “Pennsylvanie” te. Osengeli kotiyama elembo, mpe ntango etiami elembo.

¹⁵⁰ Mpe ntango Moklisto atondisami na Nsango-malamu, atondisami na bolamu ya Nzambe, makambo malamau nyonso ya Nzambe efandi kati na ye, ná motema polele, alengelami kosala mosala, akómi na mposa ya kotiyama na esika na ye, kosala nyonso oyo Molimo Mosanto akotinda ye kosala, alongwe na kufa kino na Bomoí, abulisami na makambo nyonso ya mokili, azali kotambola kati na Polé, wana Polé ezali koya epai na ye, kokende liboso, asili komilengela. Na nsima Nzambe akangi ekuke ya mokili nsima na ye, atindiki yango makasi ndenge wana, mpe atii ye elembo ya Molimo Mosanto ya elaka. Aleluya! Mpo na ntango boni? Kino esukeli na yango. Kotinda ye na nzela ya engunduka te, mpo na kobúka elembo yango mpe kofungola yango mpo ótala lisusu soki nyónsu ezali malamau. Ezali malamau, tika yango kaka kimia. Inspecteur asili kotala yango malamau. Otiami elembo mpo na ntango boni? Kino na mokolo ya lisiko na yo. Ntango nyonso wana nde otiami elembo.

¹⁵¹ “Ee, soki okufi, na nsima, Ndeko Branham, bongo nsima na yo kokufa, olobaki okokóba kozala na Yango?” Ozali na Yango mpo na libela. Epai wapi nde Bomoí ebandaka? Na etumbelo. Na ntango yango, okomona elílingí moko ya moke mpenza. Oyo wana ezali elílingí, Elembo ya Molimo Mosanto. Na sima, ekómi elílingí ya bilílingí ya bilílingí, ndenge nalobaki mokolo mosusu wana. Kasi soki okufi, okokoba koleka na bilílingí yango, kino

ntango okokóma na mwa londende ya moke mpenza, longwa na mwa londende yango kino na liziba ya mai oyo ezali kotiola malembe, longwa na liziba kino na mokelé, longwa na mokelé kino na ebale, longwa na ebale kino na mbu, bomoni, ya bolingo na Nzambe. Ozali bobele moto yango moko.

¹⁵² Bótala awa. Mobange Saulo, mobange oyo azóngá nsima, azalaki lisusu kokoka kopusana pene na Nzambe te, kasi abungaki te. Ya solo mpenza abungaki te. Azalaki mosakoli, kasi akendeki kaka libanda na Nzambe. Yango wana, bandeko, nalobaki: “Obungi te.” Na bongo, bómikanisela, abimaki kaka libanda na mokano na Nzambe, na bongo, na mbala moko, a—azangaki boyokani. Sikoyo, ntango mosusu esengelaki náloba yango te. Malamu, nazali kaka kosepelisa liyangani na mpokwa oyo. Na bongo, boyebi, na mbala moko, oh la la! na bongo . . . Akendeki ko—kotuna Urim Tumim.

¹⁵³ Boyebi oyo Urim mpe Tumim ezalaki, ezalaki líbenga ya ntólo, elamba ya bonganga, oyo—oyo Alona azalaki kolata. Mpe ezalaki ntango nyonso, Nzambe azalaka ntango nyonso Nzambe ya bikamwa, oyo ayanolaka na ndenge ya kokamwa. Mpe soki mosakoli moko asakolaki, mpe ba-polé ya kokamwa wana engengisaki Urim Tumim wana te, azalaki na libunga. Soki molóti ndoto alobaki ndoto na ye kasi yango engengisaki Urim Tumim wana te, etali ngai te ndenge eyokanaki malamumu, likambo yango ezalaki lokuta. Ya solo.

¹⁵⁴ Etali ngai te ba-diplome ya doctorat boni ozalaka na yango, mpe ndenge nini ebongiseli na yo ezalaka monene, ntango osakoli to otei, kasi elongobani na Liloba oyo te, ozali na libunga, ndeko. Ozali . . . Oyo nde Urim Tumim ya Nzambe. Ntango olobi ete obongisamaki te liboso na kozalisama ya mokili, ekongenga te, mpo Biblia elobi ete ezali bongo. Ntango olobi ete osengeli kobatisama na Nkombo ya “Tata, Mwana, Molimo Mosanto,” ekongenga te, mpamba te moto moko te na Biblia abatisámá lolenge wana. Kaka na Nkombo ya Nkolo Yesu. Ekongenga te, elingi koloba, mbeba moko ezali esika moko.

¹⁵⁵ Boye Urim Tumim elingaki koyanola mobange Saulo te, mpe azalaki ata kokoka kolóta ndoto te. Akendeki mosika mpenza na lolenge ete azalaki ata kokoka kolóta ndote te. Boye, boyebi likambo nini ye asalaki? Akendeki epai ya mwasi ya solóka, mobange mwasi ya solóka, mobange nganga ya zabolo oyo azalaki kuna, nganga-nkisi. Mpe alobaki: “Okoki kobíkola?”

¹⁵⁶ Alobaki: “Iyo, kasi Saulo alobaki ete akoboma bato nyonso oyo babíkolaka.”

¹⁵⁷ Alobaki: “Nakobatela yo,” alataki lokola sodá. Alobaki: “Bíkólá mpo na ngai, mpe matisela ngai uta na mokili ya bakúfi oyo basili koleka na ngámbo mosusu awa.” Sikoyo bóyoka likambo oyo. “Matisela ngai molimo ya mosakoli Samuele.”

158 Mpe abandaki ko—kobíkola. Mpe, nsima na yango, akweyaki na elongi na ye, alobaki: “Namoni banzambe komata.” Bomoni, azalaki mopakáno, “banzambe,” mibale to misato, lokola Tata, Mwana, Molimo Mosanto, to eloko moko ya ndenge wana, boyebi. Alobaki—alobaki: “Namoni banzambe komata.”

159 Alobaki: “Limbola lolenge na ye. Azali ndenge nini? Azali komonana lokola nini?”

160 Alobaki: “Azali nzoto mike, mpe alati kazaka na mapeka na ye.” Abongwanaki ata moke te.

161 Alobaki: “Ezali Samuele. Yaka na ye na ndako oyo, yaka na ye awa, liboso na ngai.”

162 Mpe, bótala malamumu, ntango Samuele akómaki liboso ya Saulo, alobaki: “Mpo na nini obengisi ngai, mpamba te okómi monguna ya Nzambe?” Mpe bótala malamumu. Ezalaki kaka te ete azalaki Samuele kino wana, azalaki ntango nyonso na molimo ya lisakoli. Bóloba ete ezali lokuta, moto moko áloba ete ezali lokuta. Ezali Solo! Azalaki kaka mosakoli. Mpamba te alobaki, asakolaki mpe alobaki: “Etumba ekobalukela yo lobi, mpe yo ná bana na yo ya mibali, bokokufa na etumba lobi, mpe lobi na mpokwa, na bangonga oyo, bokozala elongo na ngai.” Ezali solo? Azalaki kaka mosakoli!

Sikoyo okoloba: “Oh, kasi oyo wana, mwasi ya solóka moto asalaki yango.”

163 Malamumu, nakoyebisa yo Moko, oyo azalaki mwasi ya solóka te. Yesu azuaki Petelo, Yakobo ná Yoane, mpe bamataki na Ngomba ya Mbongwana, mokolo moko, mpe batelemaki wana likoló na ngomba. Mpe, Yesu, Nzambe azalaki kotia na esika Mwana na Ye; ndenge nazali komeka... ndenge nalobaki na mpokwa oyo eleki, kotia mwana na esika yango. Mpe ntango basalaki yango, batalaki zingázingá mpe bamonaki ete Mose ná Eliya batelemaki wana. Bazalaki kosolola, koyokana. Ezalaki te mwa babendéle ya mpembe, oyo ezali kotepa-tepa, to mwa mapata ya mpembe, kútu, oyo ezali kotepa-tepa. Kasi bazalaki mibali, bazalaki kosolola. Mose asiláká kokundama na nkunda oyo eyebanaki te, mibu nkama mwambe liboso na yango. Mpe Eliya asiláká kozonga Ndako na likálo, elekaki mibu nkama mitano. Kasi awa bango nyonso mibale bazalaki wana, na bomoi mpenza, kaka ndenge batikálá kozala na bomoi mpenza, batelemaki wana kosololáká na Ye liboso Ákende na Kalvari. Aleluya! “Totiami Elembo kino mokolo ya lisiko na biso!”

164 Nakosala noki, na nsima tokosilisa, mpo ntango eleki, mpe tokobondela mpo na babeli, etikali pene na miníti mitano. Molongo ya 14, kotánga, bótika nátánga oyo ya 13 lisusu, mpo tózua moboko.

*Kati na ye bino...botiaki elikia, nsima na bino
koyoka liloba ya solo, nsango-malamumu ya lobiko na
bino:...*

¹⁶⁵ Sikoyo, bómikanisela, lobiko nini bazalaki na yango? Bango bazalaki—bango bazalaki Baklisto ya Efese. Bango, sikoyo bótala, bomonaki malamau Bakorinti? Asengelaki ntango nyonso koyebisa bango: “Ntango nayaka epai na bino, moko azali na monoko na sika, mosusu azali na monoko na sika, mosusu azali na loyembo, mosusu azali na lisakoli, mosusu azali na . . .” Bomoni, akokaki koteya bango eloko moko te, mpo bazalaki ntango nyonso na mposa ya *oyo*, *oyo kuna* to *oyo mosusu*. Bato oyo mpe bazalaki na likambo yango moko, kasi batiaki yango na molongo. Ateyaki Bakorinti likambo ya ndenge oyo ata moke te, akokaki kosala yango te, lingomba ezalaki na molongo te mpo na koteya yango. Sikoyo, akokaki koteya bato oyo awa likambo ya solosolo.

. . . oyo, ya lobiko na bino, kati na ye nsima na bino . . .
kondima, bino botiamaki elembo na *Molimo mosanto ya elaka*,

Oyo ezali ndanga . . . (Oh, náleka yango te.) . . . *ndanga ya libula na biso kino* . . . *lisiko ya baoyo Nzambe asilaki kozua, mpo na kosanzola nkembo na ye*.

Fiuu!

¹⁶⁶ Molimo Mosanto ezali nini? Sikoyo, na bongo, nakotángá oyo etikali mbangu mpenza, soki bokoyíkela ngai mpiko kaka mpo na oyo. Tokómaki wapi na mpokwa oyo eleki, Ndeko Mike? Esika bango nyonso bazalaki na esengo, oh, nyonso ezalaki na kimia, ezalaki bolingo oyo ebongi be. Sikoyo, mbala nyonso ozali koyela *boye*, ozali kokita mwa moke-moke. Mbala nyonso ozali kobwaka lokolo, ozali kopusana ba-centimètre pene koleka. Ntango ekitaka na mabelé, otikali na elílingí ya elílingí ya elílingí ya bilílingí. Sikoyo, yango nde motango oyo Molimo Mosanto ezali kati na yo. Yango nde bolingo. Kasi, oh, ozali koyoka mposa ya eloko moko.

¹⁶⁷ Oh, bato lokola mibange, bakolinga te, mibange . . . Nakosepela mpenza kozonga kozala lisusu na mibu zomi na mitano to ntuku mibale! Oh, nakopesa nyonso oyo nakoki kopesa. Ekosunga ngai na eloko nini? Nakokaki kozala na mibu zomi na mitano, mpe ata bongo kokufa na mpokwa oyo. Eyebani na yango mpenza te. Bongo soki ozalaki na mibu zomi na mitano na mpokwa oyo, ndenge nini okoyeba soki mama na yo akozala na bomoi, ntango okokóma na ndako, to te? Ndenge nini oyebi soki okokóma na ndako? Ndenge nini oyebi soki okozala na bomoi lobi, soki ozali na mibu zomi na mibale, na nzoto kólóngóngú mpenza? Bakoki koboma yo na likama ya motuka, okufi mbala moko, likambo nyonso ekoki kokómela yo. Eyebani mpenza te, bomoni. Awa, ezali na eloko moko te awa oyo eyebani mpenza. Kasi ozali na mposa na yango makasi. Ezali nini? Ezali Eloko oyo ezali Kuna na likoló nde ezosala ete óyoka mposa na yango.

168 Sikoyo, okoti na kati ya likambo Oyo, bongo ozui Bomoï na Seko. Sikoyo likambo nini ezali kosalema? Ezali “ndanga.”

169 Mbongo ya ndanga, mpo na kozua eloko moko, ezali nini? Soki nayeï kosomba motuka epai na yo, nalobi: “Motuka wana ezali ntalo boni?”

170 Olobi: “Motuka oyo, Ndeko Branham, ntalo na yango ezali ba-dollar nkóto misato.”

“Kofuta ndambo liboso ezali boni?”

“Ee, nakoki kopesa yo yango na ba-dollar nkama mitano.”

171 “Malamu, ba-dollar nkama mitano yango oyo. Nako—nakoyela yo oyo etikali na ntango moko boye, ntango nakozua yango. Bómba motuka yango.” Napesi yo ba-dollars nkama mitano, yango nde ndanga. Boye te?

172 Sikoyo, bóbosana yango te, ezali “ndanga,” ezali “oyo efutami ndambo liboso.”

. . . nsima na bino *kotiama elembo* na . . . *Molimo ya elaka*, na . . . *Molimo ya elaka*, . . . nsima na bino *kotiama elembo* . . .

Yango ezali . . .

Nini? Elembo ya elaka, elaka ya Molimo Mosanto ezali nini?

Yango ezali ndanga ya libula na biso kino . . . *lisiko ya baoyo Nzambe asilaki kozua* . . .

173 Ezali nini? Ezali oyo efutami ndambo liboso. Mpe, ndeko, oh, oh, oh, oh, oh, batei! Soki oyo ezali mbongo oyo efutami liboso, ekozala likambo nini ntango biso nyonso tokokóma kuna! Ekozala likambo nini? Soki oyo ezali e . . . Soki oyo nde tosepelaka na yango mingi sikoyo, mpe totóndaka na esengo na lolenge ete . . . Namóná mibali ya mibu ntuku libwa koya . . .

174 Namóná mobange motei moko kotelema na mpokwa moko. Ayaki, alobaki . . . Ndenge *oyo* boye, koyáká na etumbelo. Mpe nalobaki: “Mobange wana nde akoteya?”

175 Alobaki: “Ee, Nkolo ápambolama.” Mobange moindo moko, alataki kazaka moko ya monene ya batei.

176 Nalobaki: “Mpo na nini batiki te ete moko na bilenge batei mosusu báteya? Mobange yango, ndenge nini akokoka ata koteya?”

177 Alobaki: “Ee,” alobaki, “bandeko,” alobaki, “lelo, nayoki bandeko koteya mói mobimba,” alobaki, “na ntina na makambo oyo Yesu asalaki na mokili. Ngai nakolobela oyo Ye asalaki na Likoló.” Alobaki: “Nakozua motó ya liteya na ngai na Yobo 7:27,” alobaki, “kuna mosika kala mpenza, liboso na kozalisama ya mokili,” alobaki, “ntango Alobaki ete minzoto mia ntongo mozalaki koyemba elongo mpe bana na Nzambe bazalaki kogánga na esengo.” Abandaki ndenge wana. Alobaki: “Boyebi likambo oyo, ete ezalaki na likambo moko oyo esalemaki

kuna kala.” Alobaki: “Boyebi. . .” Mpe abandaki kolimbola makambo oyo esalemaki na Likoló. Asembolaki likambo yango lokola monaná esembolami, kino na Boyei ya mibale. Pene na ngonga wana, Molimo Mosanto ebetaki ye. Sikoyo, esengelaki na bango kosunga mobange yango ámata kuna, azalaki pene na mibu ntuku libwa na mitano. Azalaki *boye*, agumbámá mpenza, ná mwa nsuki moke mpenza zingazinga ya motó, boyebi, *boye*. Amataki wana mpe abandaki koteya, alobaki: “Yúpi! Aleluya! Nkembo!” Abandaki kopumbwa-pumbwa ndenge wana. Alobaki: “Oh, bozali na esika ya kokoka mpenza te mpo na ngai koteya.” Mpe akendeki mbala moko, akitaki na nsé ndenge wana, akendeki na makasi na ye nyonso. Mpe oyo wana ezali kaka ndanga. Oh!

¹⁷⁸ Molimo Mosanto esalaka nini? Oh, esika ya malamumu yango oyo, nakotángá molongo ya 1 ya mokapo oyo elandi. Nátángá? Ezali malamumu? Bóloba: “Amen.” [Losambo balobi: “Amen!”—Mok.] Malamumu, molongo ya 1 ya mokapo ya 2, noki-noki. Bóyoka:

Bino, baoyo bozalaki. . . bino. . . Mpe epesi Ye bino bomoi, bino baoyo bozalaki moko. . . bokufaki na mabunga mpe na masumu na bino:

¹⁷⁹ “Epesi Ye bino bomoi.” *Kopesa bomoi* elakisi nini? “Ekomisami na bomoi.” Bokómaki pene na liwa, kasi Apesaki bino bomoi, kaka na mbongo ya ndanga. Ekozala nini ntango o—ntango okosilisa mpenza kofuta nyonso oyo etikali? Oh! Kokamwa te ndenge Polo, ntango amemamaki na likoló ya misato, alobaki: “Liso emóná te; litoi eyóká te; mpe ekotá te, ekotá te na motema ya moto, makambo oyo Nzambe abongísi (abombi) mpo na baoyo balingaka Ye.” Ekozala ndenge nini! Bolobela mpenza esengo oyo bakoki kolimbola te mpe oyo etondi na nkembo! Fiuu! Hmm! Bino baoyo bokufaki kati na masumu mpe mabunga na bino, Apesi bino bomoi elongo, na nzela na elílingí ya elílingí ya bilílingí. Ekozala ndenge nini ntango okoleka longwa na elílingí ya bilílingí kino na elílingí, elílingí, na nsima, kino na mokolé, mokolé kino na ebale, ebale kino na mbu?

¹⁸⁰ Ekozala likambo nini ntango okozala kuna mosika, kati na lisiko, ná nzoto ya sika mpenza, ntango okozonga lisusu elenge mobali na mobimba, to elenge mwasi, okokufa lisusu ata moke te? Mpe okobwaka miso na mokili, mpe okokanisi: “Nakokaki kosepela na mbuma ya vínyo mpe na mai malamumu ya mpio, kasi, boyebi, awa, nazali na ntina na yango te. Kasi mokolo moko Yesu akoya, mpe nzoto oyo ya banje, theophanie oyo nazobika kati na yango. . .” Ekoleka lisusu na libumu ya mwasi te, ekoleka lisusu na mposa ya nzoto te; kasi ndenge Ye abotamaki zángá mposa ya nzoto, nakosekwa na yango te, pe, mokolo moko, Akoloba, mpe bakufi kati na Klisto bakosekwa, mpe nzoto oyo na ngonga moko nazalaki kofanda kati na yango ekosekwa

mpe ekokóma nzoto oyo ekembisami, mpe nakotambola, mpe nakosolola, mpe nakozala na bomoi, mpe nakosepela (aléluya), nakozala na bomoi kati na bileko Seko oyo ekoya, na nzela na Yesu Klisto Nkolo na biso. Fiuu! Yango mpenza, ndeko, yango nde Nsango-malamu!

181 “Yango wana ngai mpe,” Polo azali sikoyo koyebisa bango oyo ye azali. Nakotánga oyo etikali, na nsima tokobondela mpo na babeli. “Liboso ya kozua mobimba na yango, oyo ezali ndanga, liboso ya kozua mobimba na yango, mpo na kosanzola nkembo na Ye.”

Na ntina na yango eyokaki ngai mpo na kondima na bino (Nayokaki ete bondimaka makambo oyo, nayokaki ete bondimaka mpenza likambo ya kobongisama liboso, Bomoi na Seko, lobiko, mpe bongo na bongo) kati na Nkolo Yesu mpe bolingo epai na basantu. . . nyonso,

Nakotika te kopesa matondi mpo na bino, nakokanisaka bino mpe kati na mabondeli na ngai;

Ete Nzambe ya Nkolo na biso Yesu Klisto, ye Tata na nkembo, ápesa bino molimo ya bwanya mpe ya emoniseli. . . boyebi na ye: Ákoba ntango nyonso komimonisa Ye moko epai na bino, bókóla longwa na ngolu kino na ngolu, longwa na nguya kino na nguya, longwa na nkembo kino na nkembo. Ezali kozonga nsima te; mpe, kasi longwa na nkembo kino na nkembo, bókoba kokende liboso. Nakokoba kobondela mpo na bino.

Mpo liso—miso ya mitema na bino. . .

182 Hmm! Boyebi, na Biblia, ekomami ete bozali bakufi miso kasi boyebi yango te. Kasi awa, Polo alobaki: “Nakobondela mpo miso ya mitema na bino. . .” Bososolaka nde na motema. Yango nde oyo ye azali kolobela. Botalaka na liso, kasi bomonaka na motema. Boyebi yango. Malamu. “Ete Nzambe na Nkembo. . .” Bózela naino, molongo ya—ya 18.

Mpe mpo miso ya mitema na bino ézua pole; ete bóyeba soki elikia ya kobengama ezali nini, mpe kofúluka ya. . . nkembo ya libula na ye, oyo abombeli basantu,

Mpe bonene ya nguya na ye oyo eleki nyonso epai na biso. . . (fiuu! Balobaka ete nguya esilá? Nguya eyei kútú naino te). . . bandimi, kokokana na mosala ya nguya na ye monene, (Bino baoyo bondimeli mosala ya nguya na Ye monene, nabondeli ete Nzambe áropa nguya na Ye likoló na bino. Bomoni?)

Oyo asalelaki mpo na Klisto, ntango asekwisaki ye uta na—ye uta na bakufi, mpe afandisaki ye na loboko na ye ya mobali. . . na bisika na likoló,

Mosika likoló na . . . mikolo, . . . mikónzi, . . . nguya, . . . bonkolo, mpe ete nkombo nyonso oyo ekoki kopesama, . . .

183 Oh, oh, oh! Bó- . . . Te, malamú nátika. Na ntembe te, tokoki kolekisa butu nyonso oyo etikali likoló na oyo wana.

. . . nkombo nyonso oyo ekoki kopesama, kaka na ekeke oyo te, kasi na ekeke oyo ezali koya:

184 Nkombo nyonso ezali—nkombo nyonso ezali nini? Nkombo nyonso, moto nyonso akozua Nkombo nini? [Losambo balobi: “Yesu.”—Mok.] Likoló mobimba ebengami na nkombo Yesu. Lingomba mobimba ebengami na nkombo Yesu. Eloko nyonso ebengami na nkombo Yesu, mpamba te Yango nde Nkombo bobele moko oyo Nzambe atikálá kozua. Abengami Jehovah: Jéhovah-Jiré, Mbeka oyo Nkolo apesi; Jehovah-Rapha, Nkolo oyo abikisaka yo na bokono; Jehovah, bendéle na Nkolo, Manase; mpe Jehovah, ba-Jéhovah ndenge na ndenge. Abengami Monzoto ya Ntongo. Abengami Tata, Abengami Mwana, Abengami Molimo Mosanto. Abengami Alfa, Abengami Omega. Abengami Ebandeli, Abengami Nsuka. Abengami Momboto. Oh, Abengami. . . Abengami na bibiangelo ndenge na ndenge, kasi Azalaki na Nkombo moko.

185 Yango nde oyo Matai azali kolobela, ntango Yesu alobaki: “Yango wana, bókende na bikólo nyonso mpe bókómisa bato bayekoli, bóbatisa bango na Nkombo,” na bankombo te, “na Nkombo ya Tata, Mwana mpe Molimo Mosant.” Tata ezali nkombo te, Mwana ezali nkombo te, Molimo Mosanto ezali nkombo te. Ezali ebiangelo na Nkombo moko. Ezali Nkombo ya misala misato ya Nzambe bobele moko. Nkombo na Ye ezalaki nini? Mwanje alobaki: “Okobianga Nkombo na Ye . . .” [Losambo balobi: “Yesu.”—Mok.] “mpo Ye nde akobikisa bato na Ye na lisumu na bango.” Ntina wana nde bango nyonso babatisaki ndenge wana, na Biblia. Ndenge wana nde Santu Augustin abatisaki Mokonzi ya Angleterre, mibu pene na—pene na nkama moko na ntuku mitano to nkama mibale nsima na liwa ya Klisto, na Nkombo na Yesu Klisto. Malamú.

Mosika mpenza likolo . . . lokumu, . . . bokonzi, . . . nguya, . . . bonkolo, ete—ete nkombo nyonso oyo ekoki kopesama, kaka na ekeke oyo te, kasi mpe na oyo wana ezali koya:

Atii mpe biloko nyonso na nsé ya makolo na ye, mpe akómisi ye motó likoló na makambo nyonso mpo na lingomba,

Oyo ezali nzoto na ye, . . .

186 Sikoyo, soki nzoto na ngai ezali na bokonzi likoló na biloko nyonso, elingi koloba, oyo nzoto na ngai ezali, yango nde oyo ngai nazali. Ezali solo? Yango nde oyo ngai nazali, yango nde oyo bino boyebi ngai. Boye te? Ee, na bongo, nyonso oyo Nzambe

azaláki, Asopaki yango na kati na Yesu, mpo Azalaki litondi ya Bonzambe kati na nzoto. Ezali solo? Mpe nyonso oyo Yesu azalaki, Asopaki yango na Lingomba: “Makambo oyo Ngai nazali kosala, bokosala makambo yango nyonso mpe. Bokosala ata ya minene koleka oyo, mpo Nazali kokende epai na Tata.”

Oyo ezali nzoto na ye, litondi na ye oyo akotondisaka nyonso kati na nyonso.

187 Oh, nalingaka yango mpenza! Nalingaka yango mpenza! Mokolo mosusu wana, nazalaki kotánga buku oyo bakomaki mpo na mobembo oyo nasalaki ntango nakendeki koteya—koteya na Afrika. Natikálá kotanga yango liboso te. Bato boni batángá buku yango, *Mosakoli Akei Kotala Afrika?* Na kati na yango, nazalaki kotala mwana moko ya mobali, azalaki Indien. Bato boni bamóná fotó yango?

188 Nayokaki evangéliste moko, abondelaka mpo na babeli, ekokisi mibu pene na zomi na mitano to koleka, alobaki: “Natikálá komona likamwisi moko kosalema te, na bomoi na ngai.” Alobaki: “Namóná bato koloba ete bazali koyoka motó mpasi, kobika. Namóná bato koloba ete bazali koyoka libumu mpasi, kobika, mpe bongo na bongo. Kasi likamwisi, eloko moko oyo ekelamí mpe esali eloko moko. . .”

189 Namilobelaki ete elenge mobali wana asengelaki kozala wana mpe ámona likambo yango. Lokolo ya mwana-mobali ya Indien wana ezalaki zingazinga monene *boye*, moko na yango. Oyo mosusu ezalaki na yango malamú, ndenge lokolo ya moto ezalaka. Mpe, soki botali malamú, mabende ya bibósono oyo ya ye, sapato na ye ezalaki likoló, centimètre pene na ntuku misato to ntuku misato na nsambo, *boye*. Atiaki eteni ya ebende na nsé na yango. Sapato na ye efandaki likoló ya bitemelo mibale ya milai. Amataki kino na esika oyo ngai nazalaki, bamatisaki ye kuna. Azalaki na nzete mibale ya bibósono. Azuaki sapato monene ya ebende wana, mpe akitisaki yango na makasi, ndenge wana. Natalaki lokolo na ye, ezalaki zingazinga monene *boye*.

190 Sikoyo, bato yango bazali Mizilmá, Ba-Mizilmá. Bozali koyeba lisusu, mokolo ya Lomongo oyo eleki, ete natángelaki bino likambo oyo bakomaki na zulunále? Nazali na yango awa, ngai moko, euti na Afrika, batindeli ngai yango na missionnaire na biso oyo auti kozonga, Ndeko Stricker. Likambo yango ekomami kuna, ndenge Billy Graham azongaki nsima, na likambo yango. Ya solo mpenza. Bazosala ete Ba-Mizilmá bátindika bango bábima mboka. Likambo yango ezali nini? Ba-missionnaire bazali kotika elanga ya koteya. Ntina nini kokóba kotikala? Bazali kolóngama mpenza.

191 Nalingaka Billy Graham, mpe nabanzaka ete azali moto na Nzambe moko ya malamú mpenza. Kasi likambo oyo Billy Graham asengelaki kozongisela ye, ezalaki koloba: “Zela naino. . .” soki mwa ba-Batiste ya lolendo oyo bakokaki

kotika ye ete ásula yango, nandimi ete alingaki kosala yango. Nandimaka ete Billy Graham azali moto na Nzambe. Kasi soki álobaka: “Zela naino! Nazali motei ya Nsango-malamu. Bondimaka Kondimana na Kala, mpe bolobaki ete Yesu azalaki bobele moto. Nabeti na yo mǒndengé ete tǒwelana na maloba.” Nandimaka te ete tosengeli kobeta mǒndengé na zabolo, te misie, kasi ngai nalingaki kozongisela ye mǒndengé, mpe koloba: “Tika ete yo ná ngai tókutana. Nazali Docteur ya Bonzambe,” Billy Graham azali Docteur ya Bonzambe, “nakobeta na yo mǒndengé na likambo yango, mpe nakolakisa yo polele ete Yesu azalaki Klisto. Sikoyo, na oyo etali lobiko na nzoto kouta na Nzambe, ngai nazali na makabo wana te, kasi tozali na bandeko mosusu oyo bazali na yango. Sikoyo, soki olingi kosangisa bato kuna, ngai nakobengisa moko na bango, Oral Roberts to moto mosusu, moto moko oyo azali na lotómo ya monene, oyo ekosala yango mpenza.” Tolingaki kokende kuna, na nsima, komona oyo elingaki kosalema, koloba: “Boklisto ezali te oyo yo okanisaka ete ezali.”

¹⁹² Sikoyo moto nyonso ayoki mawa, mpo alongwaki wana mpe atikaki ye. Ya solo, sikoyo, nandimaka likambo oyo te ya kotika zabolo ábéta na yo mǒndengé. Nabwakela ye mpe nsói na elongi, mpe natambolá na ngai. Ya solo. Kasi ntango ekomaka na esika oyo ya . . . Billy akokaki—akokaki kosala ete mizilmá yango ámiyoka lokola mwa moto moko ayebi eloko te ndenge *wana*. Akokaki kokamata Biblia wana, kozua Yisaya 9:6, mpe koloba: “Azalaki kolobela nani: ‘Mwana abotameli biso, Mwana-mobali apesameli biso?’ Moto oyo ezalaki Nani? Ezalaki nani oyo ye azalaki kolobela? Ezalaki nani, Mosakoli oyo? Masiya oyo, oyo asengelaki koya, ezalaki nani? Lakisa ngai esika amitalisaki Ye moko kati na Mahomet. ‘Azokisamaki mpo na masumu na biso, Atutamaki mpo na mabe na biso, etúmbu oyo epesaka biso kimia ekweyaki likoló na Ye, na mapipi na Ye, biso tobikisamaki na bokono.’ Lakisa ngai yango kati na Mahomet. Ndenge Agangaki: ‘Nzambe na Ngai, Nzambe na Ngai, mpo na nini Osundoli Ngai? Batoboli maboko na Ngai mpe makolo na Ngai,’ mpe bongo na bongo? Lakisa ngai yango na liloba oyo ya bino moko, na kondimana oyo ya bino moko.” Ee, alingaki mpenza kokweisa Mizilmá yango na lolenge ete alingaki koyeba esika azalaki te. Ya solo.

¹⁹³ Kasi ntango zulunále yango ebalukaki, yango nde esalaki mpasi, yango nde esalaki ngai mpasi na motema. Ntango bakomaki kuna ete: “Atako Billy asengelaki kozonga nsima, mpe bazongisaki ye nsima, ndenge nini Ba-Mizilmá bakoki koloba ete ezalaki lokuta,” bakomaki, “wana Rév. William Branham na Durban, na Afrique du Sud, ná bikamwa nsima na bikamwa, oyo bakoki koboya te, na nguya na Nzambe, mpe ba-Mizilmá nkóto zomi bakweyaki na bilongi na bango na mbala moko mpe bapesaki bomoi na bango epai na Yesu Klisto.” Na ntembe ata

moke te. Bayebi na ntina na likambo yango. Ba-fondamentaliste wana bayebi na ntina na likambo yango. Bóyebisa ngai eloko mosusu te.

¹⁹⁴ Mokolo moko, moko na bango ayaki epai na Yesu, alobaki: “Rabi!” Boyebi, azalaki Mofalisai. Alobaki: “Toyebi ete Ozali Molakisi kouta na Nzambe. Toyebi yango. Toyebi yango, mpo moto moko te akoki kosala makambo Osalaka soki Nzambe azali na ye te. Tososoli. Toyebi yango. Kasi tokoki koyambola yango te, omoni, mpo soki tosali yango, ee, bakobengana biso na lingomba na biso. Omoni, tokobungisa lokumu na biso.” Na bongo, Yesu alobaki, abandaki koyebisa ye ete asengelaki kobotama mbala ya mibale.

¹⁹⁵ Mpo na kozongela mwana-mobali oyo ya Mizilmá, ntango azalaki kuna, fotó na ye yango wana. Appareil ya fotó ekangaka lokuta te. Ye wana ateleme, lokolo moko ezalaki mokuse boye (pene na centimètre ntuku misato na mitano) koleka oyo mosusu, atelemaki na sapato yango ya libende. Nalobaki na ye, nalobaki: “Olobaka anglais?”

¹⁹⁶ “Te, misie.” Ayebaki koloba anglais te. Molimboli alobaki: “Alobaka anglais te.”

“Okómá boye banda ntango nini?” Molimboli atunaki ye.

“Banda nabótámá.”

“Okoki koningisa lokolo yango?”

“Te, misie.”

“Ondimeli Yesu Klisto?”

Alobaki: “Nazali Mizilmá.”

Nalobaki: “Okoyamba Yesu Klisto soki Abikisi yo?”

¹⁹⁷ “Nakoyamba Yesu Klisto lokola Mobikisi na ngai, soki Abikisi ngai.”

¹⁹⁸ “Soki Abikisi yango, soki lokolo wana ekómi lokola oyo mosusu, okoyamba Ye?”

“Iyo.”

¹⁹⁹ “Ee Nzambe, Okosala nini?” Yango nde likambo oyo elandi; mituna nyonso ezui biyano. Ndeko Mike, namiyokaki ndenge mosusu. Nazelaki mwa moke mpo náতালা soki Alingaki koloba nini. Natalaki kuna mpe namonaki mwana-mobali yango azokende, azotambola, lokola na ngambo ya bitutu, ndenge wana. Nalobaki: “Bato boni kati na bino, ba-Mizilmá, bokondima yango? Tala mwana-mobali ya Mizilmá, ye oyo, bótala ye, bótelemisa ye kuna.” Nalobaki: “Bino minganga, bólingi kotala ye? Tala ye wana.” Oh, oyebi esika ozali, na ntango wana. Bomoni, oyebi esika oteleme. Moto moko te... Azalaki wana.

²⁰⁰ Nalobaki: “Tambola kino ngambo oyo, mwana.” Mpe bazuaki ye, ayaki. (“Ta-tuu, ta-tuu.”) Nalobaki: “Ezali

komonana lokola ete ezali mokuse pene na centimètre ntuku misato to ntuku misato na mitano. Pene na *yangó*.”

“Iyo.”

201 Nalobaki: “Kasi Yesu Klisto, Mwana ya Nzambe, akoki kobikisa ye. Bino ba-Mizilmá, bokondima yango, mpe bokoyamba Ye lokola Mobikisi na bino?”

202 Maboko ya moindo nkóto na nkóto etombwamaki na bisika nyonso, ndenge wana. “Ee, Nkolo, ntango ekoki.” Nalobaki: “Tata na Likoló, soki Osílá koyanola ngai, yanola ngai nde sikoyo, oyo ezali mpo na nkembo na Yo, oyo ezali mpo na Yo. Nabondeli ete Óbikisa mwana-mobali oyo.” Nabondelaki mpo na ye, kaka ndenge wana.

203 Nalobaki: “Longola lokolo ya sapato na yo.” Molimboli atalaki ngai na ndenge mpenza. Nalobaki: “Longola lokolo ya sapato na yo.” Afungolaki basinga na yango. Mpo nasilaki komona na emononeli, likambo oyo elingaki kosalema. Alongolaki eloko yango. Ntango azuaki yango mpe atambolaki kuna, kino na esika oyo ngai nazalaki, makolo nyonso mibale ekómaki mpenza malamú, nyonso mibale etambolaki lokola makolo ya sika. Nalobaki: “Okolinga kotambola, kokende mpe kozonga?”

204 Abandaki kolela, ndenge wana, kokende mpe kozonga, ayebaki te likambo nini kosala. Azalaki kotambola ndenge wana, koloba: “E Allah! Allah!”

Nalobaki: “Yesu! Yesu!”

Oh, oh, oh! “E Yesu! Yesu,” bongo. “Yesu! Yesu,” ndenge wana.

Nalobaki: “Mituna ezali, mituna ezali?”

205 Julius Stadskev, bato boni bayebi ye? Ndeko Stadskev asílá koya na losambo, awa; auti—auti kokende na Allemagne. Alobaki: “Zela naino, Ndeko Branham, zela naino.” Mpo ábéngisa mokangi-fotó noki-noki. “Nakoki kokanga ye fotó?”

Nalobaki: “Sala yango.”

206 “Tambola kino *awa*, tia lokolo ya sapato na yo *awa*.” Atelemaki ndenge wana, akangaki mwana-mobali yango fotó kuna, ná makolo mibale ya malamú mpenza mpe etéléma malamú mpenza. Tala lokolo ya sapato na ye ya kala ná mabende ya bibósono, ndenge *wana*, ndenge *wana*.

207 Nalobaki: “Bato boni kati na bino, ba-Mizilmá, bobóyi sikoyo Mahomet lokola mosakoli, mpe bondimi ete Yesu azali Mwana na Nzambe, mpe boyambi Ye lokola Mobikisi na bino?” Maboko nkóto zomi etombwamaki. Aleluya! Bazali na mposa te ya . . .

208 Balingaka te ete éyébana, mpo tozali “batúntuki,” ndenge babengaka biso, bomoni. Ata bongo, Nzambe azali kosala.

Azali kotia Lingomba na Ye na esika na yango. Azali kosala makambo mingi mpenza, koleka nyonso oyo tokokaki ata kosala to kokanisa. Azali mpenza kaka Nzambe na mpokwa oyo, kaka ndenge Azalaka.

209 Boye, baninga na ngai ya mike, bótika náyebisa bino likambo moko sikoyo. Banninga na ngai ya motuya, bino baoyo bozali awa na ekólo oyo, ná bamosusu, na bikólo oyo bayokaka babánde, elingi koloba na bikólo ya bapaya mpe na bisika nyonso bozali, bóbanga te. Nyonso ezali malamumu. Nzambe, Tata na biso, liboso na kozalisama ya mokili, ayebaki nyonso oyo elingaki koya. Nyonso ezali kotambola ndenge elongobani. Bolingaka Ye? Batela motema na yo sémba.

210 Pe, bómikanisela, ntango péma oyo ekoleka longwa na bomoi oyo, bino mikolo to bino bilenge, mpe bino bamama, ntango bokomona babebé na bino, bebé ya mwasi, oyo akufaki liboso ákokisa mikolo mwambe to mikolo mitano, akozala elenge mwasi kitoko ntango okomona ye. Mobange ya Nkoko mobali wana, asilaki kogumbama mokongo mpenza, azalaki komona malamumu te bisika azalaki kokende; nkoko ya mwasi, ntango okomona ye, akokóma elenge mobali kitoko, elenge ya mibu pene na ntuku mibale, na bongengi ya bolenge. Mpe akotikala bongo mpo na libela. Okoki kosimba loboko na ye, bokoki kopesana mbote ya loboko. Okoyamba ye, kasi akozala “mobali na ngai” te, akozala “ndeko na ngai ya mobali.” Oh la la! Akokóma na nkembo mingi koleka “mobali na ngai.” Okanisaka ete olingaki ye? Ya solo, olingaki ye. Kasi oyo wana ezalaki *phileo*; zela ntango bokozua *agapao*. Zela ntango bokokóma na bolingo ya solosolo wana oyo ya Nzambe, na ntango wana nde bokoyeba yango. Oyo awa ezali mpenza lokola fúlu ya kala, oyo ezali kobimisa mólinga, eloko ya malonga ezali te, ezali mpamba. Likambo kaka moko oyo nakopesa bino toli ya kosala sikoyo, ezali boye, ba—ba—banninga na ngai. . .

211 Nsima na mwa ntango, nako. . . Bokolinga ete náκόba na mikapo mibale mosusu wana na ntango moko? Nkolo. . . Na—nasengeli kopema mwa moke, liboso ya kokende na Chatauqua. Sikoyo, nakoki koteya makambo oyo na mayangani wana te. Ezali na ebele na bazang-. . . kondima ebele mpenza ya ndenge na ndenge. Bomoni? Oyo ezali losambo kaka moko. Bomoni? Nakoki te. . . Awa, nazali na makoki ya koteya nyonso oyo nalingi. Oyo ezali tabernacle na ngai, bomoni, mpe nazali koyebisa nde bino. Sikoyo, nandimaka ete bato wana babikisami. Iyo, misie, ya solo, nandimaka yango. Kasi, oh, ezali malamumu mingi kotambola, ntango oyebi epai ozali kotambola. Ezali malamumu mingi, koyeba, koyeba mpenza oyo ozali kosala, bomoni, na esika ya kotatabana, kobunda-bunda. Tótelema kati na Polé, mpe tótambola kati na Polé, mpe toyebi nzela nini tozali kolanda. Ya solo. Nkolo ázala na bino.

212 Mpe soki moko moko na bino baoyo bozali awa sikoyo otiami naino na esika na yo te! Ntango mosusu ozali na yo eloko moko te bobele mwasi ya ndako. Ee, okoloba: “Ndeko Branham, natikálá kosala eloko moko te na bomoi na ngai. Nazali motei te.” Ee, ntango mosusu Nzambe atiaki yo awa mpo óbókola libota moko ya bana, uta na libota ya bana wana, libota mosusu ya bana ekoki kobima, oyo ekozala na mwana moko oyo akozala motei oyo akotinda milimo milió epai ya Klisto. Yo osengelaki kozala wana. Ozali awa na ntina. Boyebaki yango?

213 Ee, okoloba: “Oyo nyonso natikálá kosala ezali kaka kobalola mabelé. Mpe nakobima na mpokwa, nazalaki koyeba ndenge ya kokokisa bosenga ya bana na ngai te. Natalaki babólá ya bana yango, oyo bazangaki sapato na makolo. Nafandaki mpe nalelaki. Nazuaki mwa kimbambala ya motuka ya kala, mpe ngai ná Maw, tokendeki na losambo.” Komitungisa te, ndeko. Koba kaka kolinga Ye, Azali na ntina moko mpo na yo. Tikala kaka ndenge ozali, koba kaka kokende liboso. Omoni? Ntango mosusu okotikálá koteya ata liteya moko te, kasi okoki kozala tata ya tata-nkoko ya oyo akosala yango.

214 Boyebaki ete Nzambe andimaki (Tótala naino, nkombo na ye ezalaki nani?) Lewi, ete afutaki moko na zomi ntango azalaki na mokongo ya Abraham, ntango Melekisedeke akutanaki na ye? Bato boni bayebi yango? Mpe, tótala naino. Abraham abotaki Yisaka, Yisaka abotaki Yakobo, Yakobo abotaki Lewi; elingi koloba, tata, nkoko, tata ya tata-nkoko; ntango azalaki kati na mokongo, kati na momboto ya tata ya nkoko na ye, Biblia endimaki ete afutaki moko na zomi epai ya Melekisedeke. Oh la la! la la! la la! Ndeko! Oh! Nazali. . .

215 Ezali na elenge—ezali na elenge Anglais moko oyo abongolaki motema kuna, na mpokwa moko, na Angleterre, alobaki: “Nazali mpenjo na esengo! Nazali mpenjo na esengo!”

216 Iyo, boye esengo mingi koyeba ete yango ezali solo! Mpe mokolo moko ya nkembo, nayebi te ntango nini mokolo yango ekozala, kasi soki oyo wana ezalaki emononeli, nalobi te ete nazalaki awa. Bómikanisela, bóbatela likambo oyo na makanisi na bino ntango nyonso, tika ete baoyo bazali na ba-bande básala ndenge moko. Soki nazalaki kati na emononeli, to soki namemamaki na Molimo, nayebi te. Kasi ezalaki mpenza likambo ya solo, ndenge nasimbi Ndeko na ngai Neville *boye*, ya solo mpenza. Mpe nazalaki kotala mpe kosolola na bato yango. Mpe mwasi na ngai ya liboso azalaki kuna, azángaki te “mobali na ngai,” alobaki “ndeke na ngai molingami.”

Elenge mwasi oyo azaláká moninga na ngai eleki mibu ebele, azalaki kuna.

217 Ntango mosusu bandeko na ye bazali awa, Alice Lewis ya Utica, mwana mwasi Moklisto ya malamau mpenza, ya lokumu. Abalaki na mwa retard na bomoi na ye, abotaki bebé na ye

ya liboso mpe akufaki ntango azalaki kobota. Alice Lewis, nakendeki kotala ye na ndako ya kolela bibembe. Nautaki kozonga na ndako, nayokaki ete akufaki. Nakendeki kuna, moto moko te azalaki na kati ya chambre yango, nalobaki: “Mwasi moko azali awa, Mme. . .” Nkombo na ye ekómaki Emmerke. Abalaki elenge mobali moko malamumu ya Moklisto, mpe ye azalaki elenge mwasi moko malamumu ya Moklisto. Nakendeki elongo na elenge mwasi yango na bisika ndenge na ndenge, na bisika ya ndenge na ndenge, mpe nyonso wana. Tozalaki naino bana-mike, ya mibu zomi na mwambe, zomi na libwa, na bisika ndenge na ndenge, Moklisto malamumu, natikálá koyeba ye na eloko mosusu te, bobele Boklisto ya solosolo. Mpe ngai nazalaki mosumuki. Kasi nazalaki kokende elongo ná ye. Nakotaki na. . . Mpe mobali na ye azalaki Moklisto oyo abotami mbala mibale, mobali ya solosolo. Mpe nayebaki te; nayebaki ete autaki kokufa, nautaki komona yango na zulunále. Mpe nakendeki kuna, mpe bayebisaki ngai. Nakendeki kuna, epai ya Coats, mpe nalobaki: “Mme Emmerke moko azali awa?”

Alobaki: “Billy, azali na kati ya chambre oyo kuna.”

²¹⁸ Nakotaki kuna mpe natelemaki pembeni ya sanduku yango. Nakanisaki: “Alice, nakendeki na bisika ya molíli koleka, nakendeki na banzela ya molíli. Yo ná ngai tozalaki kotambola elongo na banzela mpe kuna na ngambo ya ebale, ntango bazaláká kolakisa théâtre na masuwa, tozaláká kofanda kuna mpo na koyoka orgue ya vapeur wana kobeta. Komata mpe kokita na ba-balabala, ozalaki mpenza mwasi ya kiló! Natondi Nzambe mingi mpo na bomoi na yo. Péma, molingami ndeko na ngai ya mwasi, péma na kimia ya Nzambe.”

²¹⁹ Mpe na butu wana, na emononeli yango, ayaki mbangu epai na ngai. Alobaki: “Ndeko na ngai mopámbolami,” mpe ayambaki ngai. Oh, oh, ndeko mobali mpe ndeko mwasi, ebongoli ngai. Nakoki lisusu kozala ndenge moko ata moke te. Ezali mpenza likambo ya solo! Ezali mpenza—ezali mpenza ya solo kaka ndenge nazali kotala bino, ya solo mpenza. Boye, kobanga ezali te. Nakoki kokufa liboso ete butu ésila.

²²⁰ Nalingi kobókola mwana na ngai mobali ya moke, oyo azali kuna na nsima, Joseph. Nalingi komona ye na eteyelo, ntango nakokoka kozua Biblia oyo. . . ntango nakokóma na esika oyo nakomona Joseph na eteyelo, koteyáká, lokola—lokola elenge mobali oyo atondisami na Molimo Mosanto, oyo apakolami na Molimo ya Nzambe likoló na ye. Mpe nandimi ete akozala mosakoli. Mokolo oyo ntango na—ntango na—ntango namonaki ye, mibu motoba liboso ábótama, bozali koyeba lisusu ete nayebisaki bino ete azali koya. Bozali koyeba lisusu ndenge nabengaki ye, kuna, pembeni ya etumbelo, kozanga koyeba oyo nazalaki koloba, nazalaki kobulisa ba-bebé, nalobaki: “Joseph, ozali mosakoli.”

221 Mokolo mosusu, azalaki na lopango kuna, akotaki na ndako mpe ayaki epai na ngai, alobaki: “Papa, Yesu azali na loboko lokola oyo ya yo?”

Mpe nalobaki: “Ee, iyo, mwana na ngai. Mpo na nini?”

222 Alobaki: “Nafandaki na velo na ngai, nazalaki kozela ete Sara” oyo wana azali ndeko na ye moke ya mwasi, “ázonga na ndako kouta na kelasi.” Afandaki wana. Nalingaka kotika ye ákende na nzela te, afandaki *boye*. Mpe alobaki: “Natalaki likoló, mpe,” alobaki, “ntango nasalaki yango, loboko moko lokola oyo ya yo, ezalaki kuna, ná elamba ya mpembe, ezalaki likoló na ngai.” Mpe alobaki: “Emataki na likoló.” Alobaki: “Loboko oyo emataki na likoló ezalaki nde ya Yesu?” Natalaki mama na ye, mama na ye atalaki ngai. Tokendeki epai ya Mme Wood. Akoki kozala esika moko, afandi awa. Totunaki ye mituna, motuna moko nsima na mosusu, na ndenge nyonso oyo tokokaki kotuna. Ezalaki emononeli. Amonaki yango. Ntango nakomona ngonga oyo elenge Joseph ateleme. . . Nazali na elikia ete nakozala na bomoi komona ye abali, soki Yesu aumeli.

223 Mpe nakómi mobange, mandefu ya mpembe ebimi ngai na kingo, awa. Nasílá komema. . .Nalingi komema lisusu milimo milió mibale to misato epai ya Klisto, soki nakokoka. Ezali mokano na ngai, ya koteya Nsango-malamu na bisika nyonso ya mabelé. Iyo, misie. Boye, sunga ngai, e Nzambe, nakosala yango. Boye, ntango nakomona ntango yango koya, Ndeko Mike.

224 Nakoki komona ntango oyo Mama, Meda, nabengaka ye ndenge wana, chérie na ngai, bomoni, azali. . .tozokóma mibange, komona ndenge suki na ye ezali kokóma mpembe, mpe komona ndenge tozokende, kolemba nzoto.

225 Rebekah, nazozongisa matondi mingi mpo na Rebekah. Molakisi na ye ya mizíki ayebisaki ngai na mpokwa mosusu wana, alobaki: “Oh la la! soki akobi ndenge wana, Ndeko Branham,” alobaki, “ozali ata na likanisi te na oyo akoki kosala.” Bomoni, na oyo etali mizíki. Nakolinga ete ye, mpe nakolinga. . . Nakolinga ete Sarah ázala na orgue, Becky na piano, nakolinga ete Joseph ázala na eteyelo.

226 Ntango nakomona yango kokokisama, mpe ngai ná Mama tokokóta kuna, wana tozali kotenga-tenga, nakosimba mwa língénda na ngai, na mpokwa moko boye, wana tókotambola na nzela, mpe nakoki kobwaka miso kuna na kati mpe nakomona mwana na ngai ya mobali ateleme kuna, apakolami na Molimo Mosanto, azali koteya bobele Nsango-malamu moko oyo. Nakolinga kozua mobange ya Buku oyo mpe koloba: “Mwana na ngai, Yango oyo, Ekómi ya yo. Kangámá na Yango, kokakola ata Liloba moko te. Tikala mpenza ná Yango, mwana. Komeka te, kotala te, Etali te nani atelemeli yo, nani akotelemela, Nzambe akozala na ngámbo na yo. Tényá Liloba mobimba, kaka ndenge Ekomami Kuna, mpe Papa akokutana na yo na ngámbo mosusu

ya ebale.” Nakolinga kosembola maboko mpe kolekisa loboko na mapeka ya mwasi na ngai, mpe kokatisa Yaladene.

²²⁷ Kino ntango yango ékóma, Nzambe, tika ete nátikala na elanga, ná bosembo! Tika ete ésalema! Etali ngai te soki ekosenga likambo nini, to boni, eloko nini nakosala, to *oyo*, *oyo wana* to *oyo mosusu*. Tika ete nátikala sembo mpe solo na Liloba na Nzambe ya bomoi, ete ntango mokolo yango ekokóma, nákatisa na ngámbo mosusu, mpe nákoka kobwaka miso mpe koloba: “Yo wana. Oh, moninga na ngai ya motuya, ndeko mobali ya motuya, ndeko mwasi ya motuya.”

²²⁸ Elenge motei, kende na elanga, mípésá na mosala. Bino nyonso bilenge batei mpe nyonso wana, bófanda kaka zingazinga te. Bófanda te kozanga kosala eloko moko. Bobima mpe bókende kolóngá elimo moko. Bósala eloko moko! Bókende, bóningana. Kotelema te, elenge motei, kuna. Nzambe ápambola motema na yo.

²²⁹ Ye azokanisisa ngai lisusu ntango nazalaki na mibu pene na oyo ya ye, nabanzi mwa moke elenge koleka ye. Nazalaki bobele pene na mibu ntuku mibale na mwa ndambo ntango natiaki libanga ya litúmu, kuna. Nazali komikanisela, nazaláká kolata kazaka ya bulé ná pantalon ya mpembe, nazalaki wana mpe natiaki libanga ya litúmu yango, eleki mibu pene na ntuku misato na moko. Bomoni mibu boni oyo nazalaki na yango, nazalaki na ngai elenge. Natelemaki wana, natiaki libanga ya litúmu. Natikali kokakola Liloba moko te. Nabateli Yango, mpenza kaka lolenge moko na ntango oyo natiaki libanga ya litúmu wana. Litatoli na ngai ezali kuna, nakomáká yango na lokasa ya liboso ya Biblia, nakataki yango mpe natiaki yango na kati ya libanga ya litúmu yango, mpe ezali kuna kino lelo. Mpe tika ete ékomama na nkasa ya Liloba ya Seko ya Nzambe na Likoló. Tika ete názala sembo kino na nsuka.

Sikoyo tógumba mitó, mwa moke, mpo na kobondela.

²³⁰ Na bosukisi ya mpokwa oyo, na bosukisi ya makambo oyo, mokapo moko, oyo atako elongobani te. Bosengelaki kozua oyo mosusu, ndenge akobi kokende liboso mpe atii Lingomba na esika na Yango. Nakopesa bino yango na ngonga moko boye, soki Nzambe alingi. Nasengeli kopema mwa moke sikoyo, liboso ete nákende na Chatauqua kuna, na mayangani mosusu ya minene, na nsima nakolongwa kuna kokatisa kino na Oklahoma, kolongwa kuna kino na Klamath Falls, na nsima kolongwa na Klamath Falls kino na Californie, komata na Yakima, nakozonga kaka mokolo ya 15 ya sanza ya Mwambe oyo ezali koya.

²³¹ Kasi bó тала, bóтика náтuna bino eloko moko, soki likambo moko esengeli kokómela bino to ngai, liboso ntango yango ékóma, soki nasengeli kokatisa ebale kino na Mboka wana, to soki yo osengeli kokatisa, liboso na ntango yango, kino na Mboka wana, ozali koyoka elikia, na mpokwa oyo, ete tokokutana kuna,

na Esika wana? Soki ezali bongo, tombola loboko, loba: “Nazali koyoka elikya yango na motema na ngai.” Nzambe ápambola motema na yo. Nzambe ápambola yo. Soki moto moko azali awa, oyo azali koyoka elikya yango te ete akozala kuna, mpe akolinga koloba: “Kanisa ngai, Ndeko Branham, mpo názuu elikia wana,” átombola loboko mpe áloba: “Ngai mpe nalingi kozala kuna.” Nzambe ápambola yo, madame. Nzambe ápambola yo.

²³² Tata na biso na Likoló, tomemeli Yo, na mpokwa oyo, liyangani oyo, maboko nyonso, na boyebi na ngai, ezali ya kotombwama, bato nyonso, longola bobele moto moko, elimo moko ya motuya, na nsima awa, azali na mwa bolembu, soki akokaki kokatisa kino na Mboka yango, epai wapi bolingo ya solosolo ya Nzambe etondi na mitema ya bato, na motema ya mwasi ya motuya wana, azali komituna soki akokóma na Mboka wana, soki asengelaki kokufa na mpokwa oyo, yango ekoki kobenda elimo na ye oyo elembi mpe kokótisa yango na Mboka ya Elaka ya Nzambe?

²³³ Tata na Likoló, wana natelemi awa, na eteyelo oyo mpe natei, natoki, mpe naleli, nabondeli bato, mpe nandimisi bato, tika ete násenga Yo mbala moko lisusu, Nkolo, tika ete násenga mpo na ndeko na ngai ya mwasi, kuna nsima; e Nzambe, tia na motema na ye, na mpokwa oyo, bolingo wana ya Nzambe, ete Molimo Mosanto oyo ya Nzambe, kimia oyo eleki mayele nyonso, mpo áyamba Molimo na Yo, mpe átiamu elembo na nzela na Molimo Mosanto, kino na mokolo yango. Nalingi komona ye, Nkolo, ntango tokokatisa gbagba yango. Soki ezali—soki ezali li—soki ezali litomba na ngai ete nákatisa, soki likambo oyo Olakisaki ngai ezali ya solo, soki nakatisi na ngámbo kuna, nalingi kokutana na ye kuna, komona ye kopota mbangu, kosimba ngai na loboko, mpe koloba: “Ndeko na ngai ya motuya, ezalaki na mpokwa wana nde Eloko moko elobaki na ngai nántombola loboko, ntango osilisaki koteya likoló na Buku ya Baefese. Natombolaki loboko, mpe likambo moko ekómelaki ngai nsima na yango. Ngai oyo. Nakómi sikoyo elenge mpo na libela.” Nzambe, kokisa yango epai na mwasi ya motuya wana.

²³⁴ Mpo na baoyo batombolaki maboko mpo na kotalisa ete basílá kotiamu elembo mpe kotiamu pembeni, na nzela na Molimo Mosanto, Molimo ya Nzambe ezali likoló na bango, mpe basili kozua Molimo Mosanto, basílí kotiamu elembo mpe kotiamu pembeni, ná bolingo ya bonzambe wana na mitema na bango. Totondi Yo mingi mpo na bango.

²³⁵ Kososola mpenza, Tata, ete ba-bánde oyo ekokende na mokili mobimba. Ba-micró mingi etandami na eteyelo oyo, elakisi ete ba-bánde ezali kosalema, ékotamboláká kuna, Mongongo ekokende na bikólo ndenge na ndenge na mokili, na mokili mobimba, bato ya bikólo ntuku mibale to ntuku misato bakoyoka Yango. Nabondeli mpo na moto moko na moko oyo akoyoka bande oyo, oyo azangi elikya wana ya Bomoi na Seko,

oyo azali na libatisi ya Molimo Mosanto te, tika ete Éya na mitema na bango na bopolo. Kokisa yango, Nkolo.

²³⁶ Mpe tika ete ngai, soki natikali komona bango te na bomoi oyo, ntango nakokatisa mpo na kokóta na Mboka wana, tika ete bápota mbangu mpe báyamba ngai (ngai mpe náyamba bango, bango mpe, tógánga: “Ndeko ya motuya!” bamoko na bamosusu), bálوبا: “Nayokaki bande na yo oyo elobeli Baefese, ndenge Nzambe abongisaki biso liboso mpo tózua Bomoi na Seko, mpe ezalaki na bande yango nde nayambaki Mongongo na Nzambe mpe natiamakí elembo mpe natiamakí pembeni, na nzela na Molimo Mosanto, kino na Bokonzi na Nzambe.” Kokisa yango, Tata.

²³⁷ Bikisa babeli mpe bato na mawa nyonso. Zuá nkembo mpo na Yo moko, mpo tozongisi nyonso oyo epai na Yo, na makasi na biso nyonso, na Nkombo na Yesu, Mwana na Yo. Amen.

²³⁸ Ezali na moto awa, oyo azali kobela, mpe alingi ete tótiela bango maboko mpe tóbondela mpo na bango? Bokolinga kotombola maboko? Malamu. Bokolinga kopusana na kimia, sikoyo, kino na etumbelo, awa, mpe kotelema mwa moke, wana Ndeko Neville azali koya ná oyo ya ye. . .

²³⁹ Oh, ezali komonana lokola, kobondela mpo na babeli, ezali mpenza—mpenza komonana lokola kokóma na esika oyo oyebi esika oyo otelemi, ya solo mpenza. Nzambe ayebi nyonso wana.

²⁴⁰ Ntango nakoyoka loyembo wana. . .Bóbosana te, soki botikali na bomoi ntango ngai nakokende, bóbétela ngai yango: *Ndima Kaka*. Bóbosana te, nakufi te, nakozala mosika mingi na bino te, koyokáká yango. Ngai nakoki kokufa te; Yesu apésá ngai Bomoi na Seko; akosekwisa ngai na mokolo ya nsuka; nakomona bino. Mpe soki yo moto okokende, ngai nakondima likambo moko yango na ntina na yo. Nandimi ete tokomonana lisusu.

²⁴¹ Nazali kotala mwasi ya motuya oyo ateleme awa, ná suki ya mpembe. Ozali Moklisto? Otondisámá na Molimo na Ye, kozeláká koya na Ye, ateleme awa, kozeláká ete Masuwa ékóma. Amen. Oh, ndeko mwasi. . .



KOTIAMA LOKUMU YA MWANA 4 LIN60-0522E

(Adoption 4)

MATEYA NA NTINA NA KOTIAMA LOKUMU YA MWANA

Liteya ya Ndeko William Marrion Branham oyo, eteyamaki liboso na Anglais mokolo ya Lomingo na mpokwa, mokolo ya 22, sanza ya Mitano, na mobu 1960, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org